



दर्ता नं.:४८/२०७६/७७

पुर्खा दय्क तकगु सम्पत्ति, भीगु कला व संस्कृति  
पिकाक-भक्तपुर नगरपालिका



पुर्खा दय्क तकगु सम्पत्ति, भीगु कला व संस्कृति

# स्वप

नेपाल संवत् १९४२ पोहेलागा / २०७८ माघ १५ / 2022 Jan / ल्या: ५२, दाँ:४



स्वप नगरपालिकाया प्रतिनिधि मण्डल  
बागमती प्रदेशया मुख्य मन्त्री नपां

ढयकः ढ्वंगु 'तःपाक्व-ढुनदेवी' तौं निरीक्षणय् प्रमुख ज्यू



लक्ष्मी नरसिंह देगः निरीक्षणय् उपप्रमुख ज्यू



; DkfbSlo

@)\* df3 !%, C<sup>a</sup>\$ &\*, j if\$

## सरकारःमथां स्थानीय तहया निर्वाचन घोषणा यो

स्थानीय तह जनताया दकलय् हःनय च्वडः ज्या सानिगु जनप्रतिनिधिमूलक संस्था खः । २०७४ सालय् निर्वाचित स्थानीय तहया जनप्रतिनिधि पिनगु पदावधि २०७९ जेष्ठ ५ गते सिधइगु खः । निर्वाचन आयोगं निर्वाचनया तयारीया लागिं १२० न्हू मदयक मगा धायो तःकहे पौ च्वगु खाँ प्याहाँ वल अथेनं गाथि चिड च्वंगु गठबन्धन सरकारं १०० न्हू जक ल्यं दयानं निर्वाचनया न्हि ल्या क्वःमछ्यून । आयोगं छन्हू तुं यायगु खःसा वैशाख १४ व नेकयाडः यायगु खःसा वैशाख १४ व २२ गते खुन्हू यायगु धायो न्हि ल्या नपां प्रस्ताव यायः धुंकां सरकारं कानून व संविधान ल्वाता धाधां निर्वाचन लि छ्यायगु कुतः याडः च्वंगु दः । आवधिक निर्वाचन धःगु इलय हे मयासा थव सरकार प्रजातन्त्र विरोधी व जनविरोधी जुई ।

अःपरमादेश पाखं निःस्वांगु नेपाली कांग्रेस न्हयलुवाया सरकार खः । ने.कां नं थःता न्ह्यावलें लोकतन्त्रवादी दावी याई अलय थःगु न्हयलुवाय् दःगु सरकारं निर्वाचन याकेता ग्याडःच्वंगु दः । निर्वाचनय् सु त्याता सुबुता धायगु स्वयो जनता त्याय्मः प्रजातन्त्र त्याय् मः । थःगु पार्टी त्याइगु पक्का जुयानिं जुसी क्यडः निर्वाचन याइपुं प्रजातन्त्रवादी जुय फैमखु ।

ने.कां या सभापति पुं वि.पि. कोइरालां २००७ सालं क्रान्तिया नेतृत्व याता । गणेश मान सिंह २०४६ सालया जन आन्दोलनया कमाण्डर धायक जुलासा गिरिजा प्रसाद कोइरालां २०६२/६३ या आन्दोलनया न्हयलुवाया तहलय् च्वडः ज्या साना । ने.कां या मेम्हा सभापति शुशिल कोइरालाया सरकारं संविधान घोषणा याता । अलय शेरबहादुर देउवां धःसा २०५८ सालय् प्रतिनिधिसभा उल्लेया राजाता लःल्हाय् यंकला । स्थानीय तहया निर्वाचन मयासिं हिंदादातक देशय् गनां हे स्थानीय निकाय मदयक कलंकित जुयो च्वना । अः वहे असक्षम देउवा नेतृत्वया सरकार हकनं असक्षम हे जुयता ई पिडः च्वंगु दः ।

प्रचण्ड व माधव नेपाल वैशाखे चुनाव याकेगु मति मरुपुं खः, छाय् धःसा अपुं बुइगु ग्याचिकु अमिके दः । चुनाव गुबलें मजुसा थमजु थः चुनावय् बुय मज्यु धायगु अमिगु कुमति खः । अमिगु खाँ खय् ल्यूने ल्यूने जक जूयो अः प्रधानमन्त्री देउवा चुनाव लिछ्यायगु मति खय् च्वडः च्वंगु खानय् दः । वैशाखे चुनाव मयासा देउवा सरकारं देश व जनताता अक्षय्य, गम्भीर अपराध यागु साबित जुई ।

संविधाने स्थानीय तहया प्रतिनिधिपिनगु कार्यकाल डादा जक धायोतःगु दः । पदावधी तानयगु छुनं व्यवस्था मरु । निर्वाचन मजुसा स्वतः ७५३ स्थानीय तहलय् जनप्रतिनिधि पुं मदयो हकनं २०५९ साल लिपा थें कर्मचारी पिनगु लाहातय् अधिकार वानि । अःयां संविधानं स्थानीय तहया कार्यपालिका, न्यायपालिका व व्यवस्थापिकां याइगु दक धायो तःगु अधिकार कर्मचारीं छ्यलय् फैमखु । उल्ले देशय् ब्याक अन्यौल जुई । अः जुयो च्वंगु फुक्क विकासनिर्माणया ज्यात फुक्क दिक् जुई । वडा कार्यालय पाखं बिइगु जन्म दर्ता, मृत्युदर्ता, नामसारी थजगु दर्जनौ सिफारिसत अलपत्र जुयो सारा जनतां दुःख सिइ ।

थजगु फुक्क खाँ थुइकः सिइकः सरकारं थःगु दल नपां मिलयजूपुं नेम्हा प्यम्हा कानुन व्यवसायी पिनगु सल्लाह खय् कानुन हिइकेगु खाँ हछ्याडः च्वंगु दः । व तहांगु गलत ज्या खः । सरकार अकातं डायता जुयो च्वंगु दः । देश व जनताता गालय् क्वफ्वायगु अधिकार सुयातां मरु ।

लिपा लासां अः सरकारं निर्वाचनया न्हि ल्या क्वः छ्यूसा निर्वाचन याय् मफै धायगु मरु । निर्वाचन आयोगं छकलंसां, नेक याडः जूसां सरकारं निर्वाचनया न्हि ल्या क्वः छिय वं निर्वाचन यायता तयार दः धायो च्वंगु दः । संघ, प्रदेश व स्थानीयया छकलं निर्वाचन यायगु धायगु सरकारया मति निर्वाचन मयायगु जः खः । सरकारं लिपा मलाकसें मथां निर्वाचनया न्हि ल्या क्वःछ्यू । थ्वहे देश जनता व प्रजातन्त्रया पक्ष जुई ।

पिकाक-ख्वप नगरपालिका/सम्पादक-आशाकुमार चिकंब्ज्जार, डेस्कटप-धन लक्ष्मी त्यात, आवरण सज्जा-रेणु ध्वजू, थाकू- भक्तपुर अफसेट प्रिन्टर्स फोन ल्याः ०१-६६९३०४३, ई-मेल- khwopapau@gmail.com



ब्हयः च्यागूगु स्वप पौ, बःछि पौ(पाक्षिक)



## का.रोहितया स्वकगू कोरिया भ्रमणया नुगः र्खाँ

नारायणमान बिजूवर्द्धे

सन् १९५९-६० पाखय् हे पेकिङ्गय् चवडः चवडा बलय् कोरियाली ब्वनामिपुं नपां पासा जूगु खः । उगु इलय् हे कोरियाया विषय छुं छुं खाँ थुइकागु खः । २०२३ सालय् 'भियतनाम-एक परिचय' व २०२४ सालय् 'चीन यात्रा' धाय्गु जिगु नेगू साफू पञ्चायती सरकारं 'प्रतिबन्ध' यासां 'कोरिया एक परिचय' चवय्गु जिगु मति सुंकः तय् मफया । उकिं सन १९७० पाखय् भारतया दरभंगाया जिनं कोरिया एक परिचय' चवयो नेपः मि पिन्ता कोरिया व कोरियाली क्रान्तिया विषय छुं ज्ञान बियो ग्वाकय्गु मतिं चवसा न्ह्याका । अलय् मेमेगु ज्या व बलय् थुगु ज्या दिक्ु याय् माला ।

२०३६ सालय् नेपलय् द्रुहँ वयानिं उकिता साफी याड प्रेशय् छ्वय्ता फुक्क मिलय याडः तयागु खः । उकिया दथवी कम्बोडिया व सिंहानोक्या बारे 'आधार' वा पौसं मदिकक धाराबाहिक चवसु प्याहाँ वल । दाच्छिलिपा व आधार नं बन्द जुल वनं लिपा हकनं व्यवहारिक ज्याखय् ध्यान वान । अलय् २०४५ सालया 'भक्तपुर काण्डे' पञ्चायती प्रशासनं जिगु (का. रोहितया) अपलं साफूत व सामानत मुचुल्का मयासें छुं हे मचवसें लुटेयाडः यंकला । सायद उगु कार्वाहीखय् जिगु अपलं 'पाण्डुलिपी' त नं लात जुई । छँ माला -मालाथाय् गनां 'कोरिया एक परिचय' मरु । मखुसा नेदा-प्यदा न्हपा हे व साफू पिथानय् दःगु जूसा 'कोरिया भ्रमण' या नितिं व छगू न्हयब्वया खाँ थें जुइगु जुई अलय् न्हँ न्हँपुं ब्वनामिपिन्ता कोरियाया विषय छुं भाति म्हासिइका काथं थुइकय् बिय दैगु खै ।

अलय् जि मति दयानं व ज्या याय् मफया' अथे जूगुलिं थुगु साफू खय् बः चा हाकलं जक म्हासिका पिब्वयगु कृतः याडागु खः । कोरियाया बारे सय्के सिइकेगु मति दःपुं

ब्वनामिपिन्ता थव चि मगागु थें जुयफः सां न्हँ पुं ब्वनामिपिन्ता धः सा तस्कं चिच्या हाकलं जूसां भ्या भाति जूसां थुइ धाय्गु मति तथा । थुकिया फुक्क सामग्रीत नपां जिं कोरियाया 'नयाँ प्रकाशन' पाखं कायागु खः ।

एशियाया उत्तर-पूर्वय् च्वंगु कोरिया प्रायः द्वीप मानव सभ्यताया विकासय् ग्वाहाली (योगदान) यागु भूमि मध्ये छगू खः । २,२२,००० स्वयो अपः वर्ग किलोमिटर डाडः च्वंगु कोरिया प्रायः द्वीपय् ६ लाख निसें ४ लाख वर्ष हाँया पुलांगु ल्वहँ युग (पाषाण युग) या मनूत दःगु खाँ प्राचीन अवशेषत पाखं सिइकय् फः ।

उत्तर पूर्वय् रुस, उत्तरे चीन, पूर्व पश्चिम व दक्षिणे समुद्रं घेरे याडः तःगु कोरिया १ लाख वर्ष हाँ मध्य दुइगु (ल्वहँ) युगय् हाचां गायो वपुं कोरियाली जनता थौं ६ करोड थ्यनय् धुंकल ।

धायो तः काथं १०,००० दाँ निसें ६,००० दाँ हाँनिसें (क्राइस्टेली शताब्दी ८ निसें ४ शताब्दी हाँ) कोरियाय् दास-मालिकपिनिगु राज्यत निस्वांगु जुल । उगु इलय् निसें कोरियाय् दास युगया विकास जुला धःसां पाइ मखुज्वी ।

हलीमय मेथाय् मेथाय् देशय् थें हे थानाया मानव विकास क्रम थें छसि काथं हे नियम काथं हे ४० निसें ३० द्रु दाँ हाँ आना न्हँगु ल्वहँ (पाषाण) युगया मनूत च्वँ वय धुंगु खानय् दः ।

थौं खानय् दःगु छगू हे जाति व छगू हे भाय दःपुं कोरियाली जाति न्हपा अथे धाय्गु न्हँगु ल्वहँ युगया इलय् ऐ, मैक व सामहान थजगु पुलां पुलांगु प्राचीन जाति पाखं ब्वलाडः वः गु खानय् दः । चिनियाँ तुङ्गगु, मंगोली व जापानीत थः जलाखाला जुयानं कोरियालीपिसं थःगु जातीय विशेषताता म्वाकः



## न्हयः च्यागूगु स्वप पौ, बःछि पौ(पाक्षिक)

तय्ता तः लागु दः जक दावा याइगु ।

२३०० दाँ हाँ (३०० ईशा पूर्व) कोरियाय् न्हापांगु सामन्ति राज्य कोगरो वंश निःस्वान । वनलिपा Packje (पैकजे), सिला (Silla) व काया (Kaya) नांया सामन्ति राज्यत निः स्वाना । कोगुरी वंशं हे १६६८ दा हाँ प्योङ्ग याङ्ग दयकगु खः । अलय् १६६६ दाँ हाँ उकिता राजधानी दयकगु खः ।

अलय् सन ९१८ सं अथे धाय्गु १०७५ दाँ हाँ कोरियाय् न्हःपा एकीकृत छगू तुं सामन्ति राज्य कोर्यो निस्वान । वहे राज्यं हे कोरियाया थी थी सामन्ती राज्यतय्ता त्याकः छगू तुं यागु खः । थुकीं थःगु सैनिक बलं विदेशी हमला नपां ल्वाडः अमिता बुकः थःगु राज्य व्यवस्था तस्कं बल्लाक बांलाक यंकला । कार्यो वंशं १३९२ तक अथे धाय्गु ४७४ दा तक राज्य याता ।

थुगु इलय् कोरियाया अर्थतन्त्र कला-संस्कृति, विज्ञान व प्रविधि नपां विदेश ब्यापार नपां अतिकं च्वजाय्कः हज्याकः यंकला । वहे वंशं याड थुगु देया नां कोरिया दक देश विदेशय् म्हासिइका पिबव्य फता ।

हलिमयया इतिहासय् मेमेगु राज्य तय्सं थें कोर्यो राज्य व वंशया थाब्बा-क्वबा जुल । सन १३९२ सं अथे धाय्गु ६०० दा हाँ 'लि' वंशं 'चोसोन' नां तःसां थुक्रिया नां कोरियाहे जुयो च्वना । 'लि' वंशं ५०० दा राज्य याता ।

सन १९१० य् जापानी साम्राज्यवादी तय्सं कोरियाता त्याकः उपनिवेशयात । सन १९२५ सय् कोरियाली जनताया महान नेता राष्ट्रपति किमइल सङ्गं कोरियाया राष्ट्रिय मुक्तिया निंतिं जनतात फुक्क छप्पा छधि याडः सङ्गठित याय्गु ज्या न्ह्याकल । अलय् १९३२ सं जापान विरोधी सशस्त्र गुरिल्ला युद्ध न्ह्याकल । आखिर सन १९४५ य् जापानी साम्राज्यवादी तय्ता बुकला । अलय् कोरियाता मुक्त याता । देशभक्त जनशक्तित दय्कः हला । सन १९४६ या फेब्रुअरी महिनाय् जिल्लाय् व गां -गामय् दयकगु जनसमितित पाखं उत्तर कोरियाया अस्थाई (सरकारया)

जनताया समिति दय्कला । जनरल किम इल सङ्ग उक्रिया नायो भाजु काथं ल्यला ।

अप्रेल १९४८ सं उत्तर व दक्षिणया राजनैतिक पार्टीत व जनवर्गीय सङ्गठन तय्पुं प्रतिनिधिपिसं छगू सम्मेलन याता । वहे दाँय् जून महिनाय् राष्ट्रिय पुनः एकीकरण व स्वतन्त्रताया निंतिं प्रजातान्त्रिक जनवादी गणतन्त्र कोरिया निः स्वाना । वहे काथं देशय् ब्यागु महानिर्वाचन याता । उकिं सर्वोच्च जनपरिषद निः स्वाना । ९ सेप्टेम्बर १९४८ सं प्रजातान्त्रिक जनवादी गणतन्त्र कोरिया सरकार निःस्वाना । वहे मन्त्री मण्डलं जेनरल किम इल सङ्गता मन्त्रीमण्डलया प्रधान मन्त्री व राज्य प्रमुख काथं ल्यला ।

अलय् सन १९४५ य् हे संयुक्त राज्य अमेरिकी सरकारं दक्षिण कोरियाय् 'सं.रा. अमेरिकी सैनिक सरकार' कायम याडः आना छगू सैनिक प्रशासन लागु याता । दक्षिण कोरियाली जनतां सं.रा अमेरिकाया व न्हँगु उपनिवेशवादी शासनया विरोधय् संघर्ष याडः च्वना ।

१० मई १९४८ या दिनसं सं.रा अमेरिकां सारा कोरियाली जनताया महा निर्वाचनता अस्वीकार याडः दक्षिण कोरियाय् थःगु हे अधिनय् 'बिस्कं निर्वाचन' याकला । जनताया इच्छा विपरित याकगु उगु निर्वाचन पाखं १५ अगस्ट १९४८ या दिनसं सं.रा अमेरिकां आना 'कोरियाया गणतान्त्रिक सरकार'

नांया छगू कतामारी सरकार (कठपुतली सरकार) निःस्वाना ।

२५ जुन १९५० या दिनसं अमेरिकी कतामारी सीङ्गमन री या सरकार पाखं प्रजातान्त्रिक जनवादी गणतन्त्र कोरियाली सरकार व जनतां अमेरिकापाखं न्ह्याकय् ब्यगु आक्रमणया विरुद्धय (जीवन-मरणया संघर्ष) सीयगु वा म्वाय्गु संघर्ष ज्वडः दाँ वला । उगु आक्रमणे सं.रा. अमेरिकां आना थयं मथयं २० लाख सेनात तय हला । नपां अपलं अपः अत्याधुनिक ल्वाभः (हात-हतियारत) छ्यलः क्वत्यलय्गु ज्या याता उगु ल्वापु स्वदातक जुला ।



# स्थानीय तहया निर्वाचनया न्हि ल्या क्वः छियता सरकार छाया लिफिलिफि

विवेक

सर्वोच्च अदालतया आदेशं निः स्वांगु शेरबहादुर देउवाया न्हयलुवाया डागूदलया गाथिचिडः च्वंगु सरकारं स्थानीय तहया निर्वाचनया न्हि ल्या क्वः छियता लिफिलिफि च्वड च्वंगु दः । प्रतिनिधिसभा पुनः स्थापनालिपा संविधान, लोक तन्त्र व गणतन्त्र सुरक्षित जूल दक धक्कु त्वःत जूपुं नेतात अः स्थानीय निर्वाचन नपां ग्याड च्वंगु दः । निर्वाचन आयोगं निर्वाचनया न्हि ल्या क्वः छिय माला धायानं नपां सरकार मत छुडः सुंकः च्वडः च्वंगु अजु चायपुगु खाँ खः । प्रजातान्त्रिक देशय् निर्वाचन प्रजातन्त्रया तिसा खः । दक धाइ अथेनं थः ता तस्कं (खाँटी) हे लोकतन्त्रवादी दाबी याइपुं दलतयसं संविधान व कानुन बमोजिम मयासैं मगागु आवधिक निर्वाचनता नपां थी थी त्वहः तयो लिछ्यायगु जः ग्वयो च्वंगु खानय् दः ।

स्थानीय तह प्रजातन्त्रया जग दक धाइ । स्थानीय तह बलासा जक प्रजातन्त्र बलाई स्थानीय तहता अधिकारं जायकः वियगुया अर्थ जनताता बल्लाकेगु धायगु खः । नेपः या संविधानं स्थानीय तहता कार्यपालिका न्यायपालिका व व्यवस्थापिकाया अधिकार नपां छुं निश्चित विषयलय् पूर्ण अधिकार बियो तःगु दः । थुकाथं स्वयबलय् न्हपा न्हपा स्वयो अः यायगु स्थानीय तह अधिकारं जःगु तह खः । नेपालय् संघीयताया न्हपांगु अभ्यास जूगुलिं नं थुगु कार्यकालय् फुक्क स्थानीय तहलय् उथिंयक ज्या जुगु मरुनि । अथेनं थमनं फयाथें जनताता भिं जुइगु काथं ज्या साड च्वंगु दः ।

२०७४ सालय् चुनावं त्याक वपुं जनप्रतिनिधिपिनिगु अवधि अः वइगु २०७९ बैशाख ३० गते फुइगु जुल । निर्वाचन पदाधिकारीपिनिगु पदावधि डादा तक दैगु कानुनी बन्दोबस्त दगु, संविधान व कानुनय् म्याद तानयगु बन्दोबस्त मरुगु इलय् निर्वाचन मयात धःसा तस्कं काथं मछिंगु कानुनी समस्या व्यफः । संविधानं स्थानीय तहलय् जनप्रतिनिधिपुं खाली जुइगु

मति मतःगु खयानं गाथिचिड च्वंगु डागू दलया सरकारं निर्वाचन लि छ्यायता व स्थानीय तहया फुक्क अधिकार हकनं कर्मचारी पिनिगु लाहातय् वियता जूगु सियदः । २०५९ साल निसैं २०७४ साल तक स्थानीय निकायया जिम्मेवारी कर्मचारीया लाहातय् ब्यू बलय् जनतां अपलं दुःख सिला । अः नं छगू नेगू दलया स्वार्थ स्वयो छुं नं त्वहः तयो निर्वाचन लिपालाकल धःसा प्र.मं देउवा हकनं छक शासन सत्ता न्हयाकय् मसःम्हा अक्षम सावित जुइ । नपां थव संविधान, गणतन्त्र, देश व जनताया विरुद्ध थव सरकारया, क्षमा याय मफैगु तहांगु अपराध जुई ।

शेरबहादुर देउवां हे २०५४ सालय् निर्वाचित जनप्रतिनिधिपिनिगु म्याद फुडानीं निर्वाचन नं मयासिं म्याद नं मतांसीं देशां देछिया स्थानीय निकायसं जनप्रतिनिधि शुन्य याडः बिला । लिपा वं प्रतिनिधि सभा नपां उठ्लेया जुजु ज्ञानेन्द्रया लाहातय् लः न्हाय यंकला । वं हे याड दे थयं मथयं प्यदातक जनप्रतिनिधिपुं मदय्क तयो तलासा डेढ दशक स्वयो अपः ई तक स्थानीय तहलय् जनप्रतिनिधि मदय्क तयो तला । देशता प्रतिगमनपाखय् घवाड छ्वम्हा देउवा तः क हे शासन चलय् याय् मफम्हा अक्षम दक क्वः छिडः तम्हा मनु हे अः नं सरकारया न्हयलुवा जुयो च्वंगु दः । वं हे याडः हकनं छक छयंगु क्वथाचाय् कुनय् यंकिगु खः ला धायथें च्वं । इलय् हे बिचः याय् मफूसा देउवां यागु गलितया फुक्क दोषया जिम्मेवारी नेपाली कांग्रेसं फय माली । नेपाली कांग्रेसया नेता कार्यकर्तात नं थुगु खायें तस्कं गम्भीर मजुसैं मगा ।

एकीकृत समाजवादी व माओवादीत अः तुरुन्त चुनावय् वानयगु मति तै मखु छाया धःसा उगु पार्टीत अः संगठनयायगुलि हे ढक्कः जुयो च्वंगु दः । पार्टीं तज्याय घुडानिं उगु दलतय् स्थानीय तहतक सड्गठन दय्के मलानी । देशय् तुरुन्त निर्वाचन याःसा अमिसं त्याकय् फैगु स्थिति म्हवैं जक खानय् दः । अथे



## न्हयः च्यागूगु स्वप पौ, बःछि पौ(पाक्षिक)

जूगुलि उगु दलत छुं नं छुं त्वहः तयो निर्वाचन लि छ्याय्गु कुतः याडः च्वनि । अलय् निर्वाचनया लिचवः स्वयो प्रजातन्त्र, देश व जनताता बिचः याडः हज्याय् मः ।

अः स्थानीय तहता संविधानं हे स्पष्ट अधिकार बियो तःगु इलय् न्हपा याय् थें फुक्क ज्या कर्मचारी पाखं जक याकय् फौगु अवस्था नं मरु । खास-खास जनप्रतिनिधिपिन्ता संविधान व कानुनं बियो तःगु अधिकार खःदक मनय् दःसा कर्मचारीं छ्यलय् फौ मखु । थजगु इलय् करोडौं नेपः मिपिसं दुःख सिई । थुजगु खायँ सत्ता गाथि चिड च्वंगु दलया नेता कार्यकर्तापिसं बिचः याय् मः ।

ल्याखाडः धाय्गु खः सा ७५३ स्थानीय तहलय् २९७ एमाले, २७४ ने.का, १०६ माओवादीं त्याकगु खः सा मेमेगु पार्टीं त्याकगु ७६ गू निकायत दक दता । फुक्क स्थानीय तह मध्ये ४० प्रतिशत एमाले त्याकगु दः । अः याय्गु इलय् निर्वाचनय् वान धःसा एमाले हकनं बलाइगु धाय्गु मति देउवां तःगु खानय् दः । स्थानीय तहलय् ६० प्रतिशत स्वयो अपः एमाले दःगु धायो २०५९ सालय् नं देउवा सरकारं म्याद मतांगु । ई नीदा लिपा नं अथें तुं । सत्ताय् च्वनिपिसं न्ह्याब्ले निर्वाचनय् वानय्ता प्रतिपक्षता हाँक बी । अलय् प्रतिपक्ष दलत निर्वाचनया लागिं तयारी दः धायो च्वंगु इलय् नपां सरकार सुंकः च्वडः च्वना । थव गजपुं प्रजातान्त्रिक दलत खः धाय् हे थाकुई ।

नेकाया नेतातयसं थुइकय् मःगु खौं छुलय् धःसा प्रचण्ड निर्वाचनया पक्षख्य म्हेगः नं मरु थौं नं मरु । प्रचण्ड २०७४ सालय् नेकां नपां मिलय जुयो स्थानीय तहया निर्वाचनय् ब्वति काला धःसा संसदीय निर्वाचने एमाले नपां मिलय जुयो ल्वाता । थःयाकचा चुनावय त्याकः वानय् फौगु नं खानय मरु । उकिं वं थः म्हाय्ता मेयरे त्याकय्ता मतपत्र हे खुय माल । अलय् थः सांसद पदय् त्याकय्ता मत नियगु हे स्थगित याकय् माला । अः नं वयागु बुद्धि अथेहे खानय् दः । गुगु इलय् तक न्हपायाय्थें गाथि (गठबन्धन) नपांया सरकार निर्वाचने वाड थः म्हाय्यँ, काय्चापिनिगु लागिं मेयर उपमेयर वियगु खौं पक्का याइमखु उब्लेतक व सरकारे वानय्गु कुतः याइ मखु ।

पुस २९ गते निर्वाचन आयोगया ग्वसालय क्वचःगु सर्वदलीय बैठकय् एकीकृत समाजवाद व माओवादीया

प्रतिनिधिपिसं पिब्वगु विचलं नं व पार्टीत इलय् हे निर्वाचन याय्गु पक्ष खय् मरु धाय्गु सिय् दः । माओवादीया लीलामणि पोखरेल व एकिकृत समाजवादीया राम कुमार भट्टराई संघ-प्रदेश व स्थानीय तहया निर्वाचन छकलं याय् मःगु खौं न्हि थांगु खः । थुकिया अर्थ सरकार अः या ईलय् निर्वाचने वानय्ता तयार मरु ।

कोरोनाया स्वकगु लहर सुरु जुल । थव फयांफय् मफय्क डाड पुडः वान धःसा नेपः या स्वास्थ्य प्रणालीं फयांफय् मफय्क महामारी कघाय् मफय्कः प्याहाँ वानय् फः । थवनं हाँ याय्गु न्हपांगु व नेकगु लहरया हुलय् सरकारं मः काथंया जनशक्ति, भौतिक पूर्वाधार दय्के मफःगु व स्वास्थ्य सामग्री मः काथं ब्यवस्था याय् मफःगुलिं अपलं नेपः मिपिसं मत्ययवं हे अकालं सीय माल । अक्सिजन इलय् हे मदयो सीय मःपिनी परिवारं सरकार व जनप्रतिनिधिपिन्ता सराप ब्यगु लु व थःपुं ल्वगि त उपचार याय्गु इवलय् थःपुं विरामीत सीत धःसा अस्पताल जिम्मेवार मरु दक च्वयो तःगु भ्वँतय् धुरु-धुरु ख्वयो सहिछाप तयो च्वंगु लु स्वयो मन्त्री तय्गु मन छाय् मख्वला ? उगु इलय् अपलं स्थानीय तहया जनप्रतिनिधिपिसं थः मनं फःथें फः काथं सेवा यागु खः । धात्थें खय्क स्थानीय तहलय् जनप्रतिनिधिपुं मरुगु जूसा छु गति जुइगु ? थव विषय गठबन्धन दलया नेता तय्सं बिचः मयासैं मगा । धेबा कायो हे चुनाव त्याकय्गु मति थव सरकारं तःगु खःसा व धात्थेंगु आत्मघाती सावित जुइ । अः गणतन्त्रया लागिं ल्वाइपुं दलत क्वचाक्वचा दल कमजोर जु जुं वाडालिं जुजु वादीतय्गु मनोबल अप्वयो वगु खानय् दः । थवहे इलय् न्हपा याय्म्हा जुजुं बुलुहुँ सडकय् वय्गु साहस याडः हल । गवः दलतय्सं थुइकगु ?

प्रतिगमन बाजा थाडः वै मखु । नेता तय्गु ब्यवहारं हे वइगु खः । थःगु जक प्वा चू लाकय्ता देश व जनता गालय् कुतां वासां छुं च्युता मतैपुं गाथी चिड च्वंपुं गठबन्धन दलया नेतातय्गु मति तस्कं गैर जिम्मेवारी खः । अः याय्म्हा सरकारता यत्थें ज्या सानय्गु अधिकार मरु । नेपः मिपुं न्हपा स्वयो अपलं ग्वाडः चेतित जुयो हज्याडः च्वंगु दः । देश व जनताया विरुद्धय ज्या सानिपुं नेतात छम्हा -छम्हा याडः दुरुखय् वापुं भुजीं थें हाकु तिनिगु पक्का खः । धैर्य तयो स्व स्वं जक वानय् मः व दिन पक्का हे वै ।

**नगरपालिका भीगु हे संस्था खः  
इलयहे करपुल ग्वाहाली याय्नु**



न्हयः च्यागूगु स्वप पौ, बःछि पौ(पाक्षिक)

वडाध्यक्षया िह पौ पारखं

## मांया इच्छा मदयूक सिफारिस बिय मछिं

कुशल

सुथाय् थयं मथयं ९:०० ता इलय् छु वार थें बांलाक लुमांसे मवः । वडाय् सुथाय् ७ बजेया बैठक सिध्यूकः जा नः वानय् दक जि वडां प्याहाँ वयो च्वडागु । कर्मचारी सः मतागुलिं वडाय् लुखाया खापा तिय् दक वडां प्याहाँ वया । उब्ले हे छम्हा म्हासियाम्हा मनु छम्हा ज्व ज्वलपा धा धां थयंक वला । जिं मूलूखाय् तालं गव्य् धुंक व मन्याता ज्व ज्व लपा धाया । व भाइया पुलांगु छँ जिगु छँ या पूर्वपाख्य ला । अलय् वयकपिनि छँ जः तः हाड वसेलिं छँ चिच्याखाडः वयक भाइया परिवारपुं उगु पुलांगु छँ मच्चसें मेथाय् च्वँ वांगु नं तः दा हे दय धुंकल । अलय् गना च्वँ वाना धायगु मसियागुलिं छु खः लय् भाइ ? अः गना च्वडः दिया जक न्यडा । ठिक हे जू दाइ, पुलांगु छँ थाय् मगागुलिं अः दुवाकोटया न्हति थःगु हे बुई टहरा गवयो च्वडः च्वडा दक लिस बिला । उलि धायवं जिं थुल - अमिगु व जिमिगु बुं नपां नपां जूगुलिं पक्का हे आना हे टहरा गवयो च्वड च्वना ज्वी । न्हापा न्हापा वापिज्या बलय बुई नाः छुयगु इलय् ल्वापु जुइगु खाँ लुमाड वल । बुई ताड तःगु कि, च्यांया बारे इलय् ब्यलय् ल्हययो तकला दक ल्वापु जुइगु । वयक भाइ नपां धःसा अथे ल्वापु जूगु मसिया धात्थे काय् म्हयाय् पुं तः ह्रिडः सः स्पूपं जुयानिं सांस्कृतिक स्तर च्वजायो वसेलिं अथे ल्वाय मज्यु धायगु खाँ थुल ज्वी नपां जि गःनां थःगु ज्याख्य फूसद मदयो बुई वानय् मफयागु नं तः दा हे दत । उकिं नं ल्वापु स्वय म्वःगु खः ला ? अलय् जिं वडा कार्यालय छाय् भायालय् भाइ दक न्यडा ? वयकलं छँ भातिचा पारिवारिक समस्या वगुलिं छि नपां हे छक नपालाडः खँलाबल्हाँ याडः सल्लाह काय दकः वयागु जक धायो दिल । वयकया खाँ न्यड जिता तालं चायूकः तलय् वाडः च्वनयगु मन मन्हयात । छाय् धःसा थौं मिटिड्गे चिया नं मरुगु व जानयगु ई नं जूगुलिं जिता नय् पित्यात । अले जिं व

भाइया लाहा ज्वडः नु नपां वानयँ अलय् लाँ दूच्छि खाँ ल्हा ल्हां वानय् जक पला न्हयाका । वं खाँ छुड दिल - दाइ नं जिमि परिवारत सकसितां म्हा मस्यगु मखु । ब्वा मरुगु नं तः दा हे दत । दाइ व जि बिस्कं बिस्कं च्वडः नयो च्वडागु । दाइ भौखेले च्वड दी सा जि दुवाकोटय् । दाइचाव जि गु दशवी छुं विषय खाँ मिलय मजुगु मरु । मां जिथाय् च्वडः च्वंगु दः । अमानं चयदा क्यन । अमा अः मचातथें जुयो वान । जिमि खाँ जू काथं थानाया पुलांगु छँ ककापिन्ता मियो उकिं वैगु धेबा स्व ब्व थयो कायगु व अमाय् भागय् वैगु धेबा वडाया सहकारी खय् हे तयगु जिमिगु मौखिक सहमति जुगु दः । अमां गुब्ले छँ मियगु गुब्ले मियगु मखु धायो मचातयसं थें खाँ ल्हाडः च्वंगुलिं छि छँ छक भायो सम्भेयाडः बिया अलय् दाइ नपां नं सम्पति इड वियगु खाँ छक खाँ ल्हाडः बिया दक धायो दिल । अलय् जिं छिमि हे खाँ मिलय याय् धुंसा जि छाय् वय माला ? छँ नामसारी यायता घर बाटो सिफारिस कः वा । ककापिन्ता नं ब्वडः भासं । अलय् सम्पति इयगु प्रस्ताव नं न्हिं । अलय् जिं वहे काथं सिफारिस बिय । विवाद हे मरुगु विषय पारिवारिक समस्या हे मत नि । थजगु सहमति खय् वडा व वडाध्यक्ष म्वँ । जिमिसंयां गनां खाँ मिलय मजूसी दक समस्या ज्यंकयगु लाँपु क्यडः बियगु जक खः । अथेनं भाइ नं हकनं धायो दिल ।- खः थें डांक औपचारिकता पू वांकयता जक जूसीं छि छकः भायो दिसँ, अलय् छि साक्षी छकसां च्वडः दिसँ । भाइया खाँ नाई नास्ति याय् मफयो जिं ज्यू । बैठक सतिबलय् जिता नं खबर यो जि वय् दक बचं बियो जि भाइ नपां त्वः त जाः नयता वाडा ।

छँ थें बलय् जहानम्हा जा नयो अफिसय् वानय् धुंकः च्वं गुलिं जि याकचा जा नयो च्वडा । उब्ले जिगु मनय् व भाइया खाँ लुमाडः वल- छाय् वं जिता साक्षी च्वँ

धाला ज्वी । छँ याय् पिनिगु खाँ मिलय जुय धुंकयां वडाध्यक्ष मःगु हे मखु । हकनं थः मां व दाजु नपां नं स्वापु बां हे ला हँ । अथे नं 'औपचारिकता पू वांकयता जूसीं छँ छक भासँ' धाला । जा ननं बिचः याड स्वया बलय् व भाइया खाँ गनां हे भांगः लाइगु व कतिला पाक खाँ मखाडा ।

शुक्रवार बहनियाय् जा नयो च्वडा बलय् छगू म्हामसियागु नम्बर फोन वल । जिं जानयो च्वडागुलिं फोन मल्हाडा । जा नय् धुंकः म्हामसियागु नम्बर जूसीं वहे नम्बरे जिं फोन याडा । फोनय् लिस वल दाइ नमस्ते जि अखुनुं वयाम्हा छिम्हा जलाखाला भाइ राम प्रसाद सुवाल (छुडागु नां), दाइचा जि व नानी च्वड कन्हे शनिवार सुथाय् ७ ता इलय् दाइया भौखेलया टहराय् च्वनयगु खाँ क्वः छिडा । छि भायो दिय् माल । जिं ज्यू जि वय् धायो फोन तयो बिया । फोन तय् धुंक जिता व भाइयायगु खाँ भाति-भाति शंका लगे जुयो वल । अलय् वयूक भाइ, केहँमयजु, दाइया न्हापा यायगु पृष्ठभूमि व व्यवहार अथे बांमलाथें यां मच्चं । अथेनं पारिवारिक खाँ मिलय जुल धः थाय् जिता सःत गुलिं छुं छुं खाँ लुकुं बिड च्वंगु जरुर हे दै जक शंका नपां मन भातिचा गयाडः वल । व भाइया खाँ अथे मरुसां गनां गनां घर सल्लाह मिलय जुय धुं थाय् जिता सःतः छुं भाति चलाखी याय् तांगु खः ला दक मनय् वान ।

कन्हे खुन्हुं व भाइ नं धःगु इलय् हे थः दाइ कृष्ण राम सुवाल (छुडागु नां) या छँ थयंकः वाडा । कि जाम्हा नं थयंकः वयो च्वंगु जुल । ॐ शान्ति धर्मय वाडः च्वंम्हा छम्हा ब्योह मजूनम्हा क्येहँ मयजु छम्हा नं वयो च्वंगु जुयो च्वना । नपां चिया विस्कट नं तयारी याडः तय् धुंकगु जुयो च्वना । छँ चिया हे मत्वसे वाडागुलिं चिया व बिस्कट नं काकां परिवारया उसायँ नपां-नपां न्हयसः छु डा - दाइया छु याड दिया ? मचात





## न्हयः च्यागूगु स्वप पौ, बःछि पौ(पाक्षिक)

गवम्हा दता ? भाजजू छु याड दिला ? टहरा गुब्ले दयूकागु ? मचातयगु पढाइ गथे च्वं ? अलय दाजुम्हासिनं लिसः बिल- जि न्हापां निसैं हे मोटर चल्य याय्म्हा अनं वहे ज्या । अः नं थःगु हे सेकेण्ड ह्याण्ड गाडी दः । काय् पुं नेम्हां ख्वप मा.वि. प्लस टु ब्वडः च्वंगु दः । पढाइ गथे च्वं वयां मसिया । अमिकय हे न्यड दिसैं । अपुं नं थाना हे क्वथाय् दः । जहानम्हासिया छगू चिच्या हांगु ज्या दः । सुथाय् -बहनी ड्यूटी वानिगु । थव टहरा २०७२ सालया तः भवखाचा लिपा जग्गा न्याडः टहरा दयूक च्वडा । जग्गा न्याड टहरा दयूकागुलिं ऋण भातिचा दः नि । उकिं वडाया छँ मियो भातिचा धेबा वसा साहु पुलयला दक मति याडागु । अथे जूगुलिं छिता छक्वचा दुःख बियागु, अमां गुब्ले छँ मियगु धाइगु, गुब्ले मिय मखु धाइगु । अः वडाय् सिफारिस कः वय हौं हे छिता खःगु खाँ कानय् दःसा छँ याय्गु अवस्था स्वयो जूसां अमा मानय् मजूसं सिफारिस बिडला दक छिता सःत छँ सल्लाह याय्गु मतिं सः ता गु खः । केहँ मयजु नं ब्योह मजू निम्हा जूगुलिं वाता नं भाति भाति धेबा बिय माल । अथे जूगुलिं केहँ मयजुतानं साँखुया ॐ शान्ति शाखां छँ सः त तयागु दः । छि भाइ धःगु लिं थौं जिपुं स्वम्हांतु अशियारत थाना हे मुड च्वडा । वनं लिपा ॐ शान्तिया तुङ्गु नं फिड तः म्हा केहँ मयजुं धाल जि नं ॐ शान्तिखय् जुयो च्वडागु तः दा हे दत दाइ । अ जिं इहिपा याय मखुत ज्वी । जिता नं कानुनं दैगु छव्व सम्पति माला । दाइपिसं बिय नं धायो च्वंगु दः । अखुनुं नं बुँ म्यु बलय् जिं भातिचा धेबा नं काय् धुन । अः छँ मियबलय् जिता नं छव्वयां माल नि । मखुला दाइ । दाजु - किजा व केहँ म्हासियागु खाँ न्यनय् धुकः नेम्हा फुकींतुं तस्कं मिलय् जुयो नाइक खाँ ल्हाड च्वंबलय् जिगु मनय् लिक्कुडः च्वंगु शंकाया खाँ बुलुहुँ धवाथुयो वल । धात्थे परिवारे मिलय जुय धुंगु खाय् वडाध्यक्षता सःति हे मखु धाय्गु जिगु खाँ खयो वल । थुकी दुनय् कायपिनिगु पक्का नं स्वार्थ लुकुविड च्वंगु दै धाय्गु खाँ नकतिनि दाजुम्हा सिनं उल बिल । दाजुम्हासियागु खाँ न्यडः छखय्

तं नं प्याहाँ वल अथेनं तं स्याड जिं अमिता तिइजक धाया- अमाया मंजुरी मक सिं यां छुं नं काथं छँ मियता सिफारिस बिय मछिं । छिकपिसं अमाता ज्यू धायकः दिसैं । अलय् जक ज्या जुई मखुसा छँ वडाध्यक्ष सः त सां, छँ हनय् वडाध्यक्ष दःसां जिइमखु धाधां जि अमिथाय् नं प्याहाँ वया ।

जिगु लिसः अमि दाजु- किजा पिन्ता भतिचा पौ लाथे अपुं तः ला तक वडा कार्यालय दुस्वहे मव । अलय् फोन नं मया । वडाय् थजगु अपलं समस्या वयो तुं च्वनिगु जुगुलिं जिगु मनय् थुगु घटना उलि लुमाड नं मव अलय् कुतुकुल च्वनय् मः थें नं मताय्का ।

ई न्ह्याडंतुं च्वन । अथेहे खुलाति लिपा ज्वी मांम्हा कायपुं व म्हायाय् म्हा वडा कार्यालय भाला । जि वयक पिन्ता फेतु धा धां भयागुया कारणत न्यडा । तहिम्हा काय नं धाल - छिं धायो द्यूगो जिपुं यां पुलांगु छँ काका पिन्ता मियगु सल्लाह क्वः छिड थाना वयागु । अमांनं छँ मियगु ज्यू धायो मंजुर याडदिल । निवेदनं सही नं याय धुकल । जिं निवेदन स्वया घरबाटोया सिफारिस जुयो च्वना । निवेदन स्वय धुकः जिं मांम्हा सिकय् न्यडा - अमा छिं जिता म्हासियाला ? वयकलं म्हामसिया धायोदिल । जिं हकनं लिसा कायो न्यडा - जि छिगु छँ हनय् च्वंगु नं पसः तैम्हा कृष्ण नारायणया कान्छाम्हा काय् कः । अलय् वयकलं धायोदिल - छि कृष्ण नारायणया कान्छाम्हा कायला ? जिं अँ धायो विषयया खाँ छुडा - छिकपिनिगु पुलांगु छँ किजा भतपिन्ता मिय ताडागुला ? अलय् वयकलं काचाक्क लिसः बियो दिलः जिं गना मिय धायगु दः जक । जितायां जिगु नामें बैकय् धेबा तयो बिय दक ब्वडः हःगु । उकिता थानाया वडाध्यक्षया सही मः धायो थाना ब्वडः हःगु । न्हपानिसैंया छँ जिं गना मिइ दक । जिमि नायो व जि च्वडागु चिं, पुलांगु छँ गना मिई ? जि काय् पिनिगु विश्वास मरु जिता । म्हायाय् याय्गु यां भन हे विश्वास मरु जिता । व ॐ शान्तिखय् जुम्हा मनूनं जिता मखुगु खाँ ल्हाड थाना ब्वडः हैला ? वनलिजिं नेम्हा दाजु किजा व केहँम्हा सियाय्गु ख्वः स्वया । अमिगु ख्वः

ह्यो से च्वनय् धुकल । जिता तस्कं तं पिहाँ वल । मां म्हासिनं थथे धाई धाय्गु सियो जिता छँ सः त खाँ न्यकय् बियाता न्हपालाकंतुं बैठके सःतगु जुयो च्वना । जिं तं प्वः चिडः धाया मांया सहमति मदयकः छुं हालतय् सिफारिस बिय हे मछिं , वनलि ककापुं नं वडाय् भयायो सिफारिसया लागिं अपलं विन्ति भाव याड दिल । जिं सिफारिस बिय हे मछिं धायो तुं च्वडा । उब्ले हे जनप्रतिनिधिपुं नं भाल । वयक पिसं नं सिफारिस बिय मछिगु सल्लाह बियो दिल ।

शुक्रबार निर्वाचित समितिया बैठके थुगु विषय खाँ छुड बैठक न्हयाका । जनप्रतिनिधिपिन्ता विषयया गम्भीरता व घटनात छसिकाथं काडा । समितिं वडाबासीपिन्के नं छकः सल्लाह काय माली । छँ अपलं चिच्याखागुलिं ककापिसहे काय धःगु खःसा मां म्हा सिनं मंजुरीनामा ब्यूसा सिफारिस बियमाली धाय्गु खाँ क्वः छित । उगु क्वः ज्यूगु खाँ काथं जिं नेम्हाप्यम्हा वडाबासीपुं नपां नं सल्लाहबल्हा याडा । वडाबासीपिसं सिफारिस ब्यूसा पाइमखु कायपुं टहराय् च्वडः च्वंगुली छँ दानयता भातिचा जूसां गवाहाली जुइ धाय्गु सल्लाह बियो दिल ।

वनं छुं नं दिन लिपा हे न्हपायाय्थे मांम्हा ज्वडः कायपुं व म्हायाय्म्हा सिफारिसया लागिं वडा कार्यालय वल । अथेनं वडाय् याक्का तयो मांम्हा सिकय् छिगु सहमति दः गु ला मरुला दक न्यडा । वयकलं लिसः बियो दिल 'मियगुयां जि छिति हे मनय् मरु । अलय् कायपिसं थव हे धेबां न्हँगु छँ दानय्गु खाँ ल्हाडः च्वना । म्हायाय्ता नं भाति भाति बिय नं माल । कान्छाम्हा काय् नं जिता लहिय धःगु दः । जिगु भागय् वैगु धेबा जिगु हे नामय् तय्गु खाय् (शर्तय्) जिता मंजुरी दः बाबु ।

वनलिपा जिं कान्छाम्हा काय्ता सः त मांया भागय वडगु धेबा वयकया नामय् हे मुदती खाताय् तय् धाय्गु बचं क्वकाय्कः सिफारिसया ज्या ह्युयाय्ता तोक सिफारिस बिया । उकिया च्यान्हू लिपा कान्छाम्हा काय् भाजुं जिता अमाया नामय् वडाया सहकारी धेबा तयागु पासबुक व कार्ड केनय् हला ।



न्हयः च्यागूगु स्वप पौ, बःछि पौ(पाक्षिक)

# लुमन्ति छुं काकाभाइ दाइलिसँया

तेजेश्वर बाबु ग वंगः



ताःतक बुसाया चिं छुं ल्यनिगु दुसा लुमन्ति छता थें चासे वइ, जब लुमन्तियात हनाः थयंके मासे वइगु पहः चहः च्वमि स्वभाव जुयाबिइ । थव लुमन्ति हनाः काकाभाइ दाइया । छम्हा मनु बांलाः म्ह मनु-पहलं नं, ख्वापालं, दुनं-पिनं ।

तुइ नं मखु हाकु नं मखु मुस्या रंगं जिना च्वंम्हा काकाभाइ ख्वपदेशय् सकस्यां काकाभाइ । काकाभाइ दाइ मुस्याथें माकु । हृष्टपुष्ट नं तः गवः मुस्या थें । मुस्या मात्र सियेसयेके माः, पट्पट् मुइ । स्वये-हे यापुसे, ई चुलुचुलु वनी ।

सके छितः सवाः काये मासें वइ । अथवा ई चुलुचुलु वन जुइ । सवाः व चुलुचुलु ईया छुं सिये मदुगु स्वापू दु थें । सायद व स्वापु म्हसिइगु व बुला वनेगु पहः थें सायद व पहः नाप हना वनेगु पासा जीवनया पहः चह थें । काकाभाइ दाइ नाप बुलेगु पहः धात्थें माकु तः गवः मुस्या थें ।

काकाभाइ छम्ह । वया तःगु पलाः छुं छताबता समाज सेवा, छुं छताबता साहित्य संगीत व प्याखं कलाया दबुलिइ पिदनाः म्वायेगु । म्वायेत पिदने सकेमाली । म्वायेत पिथने फयेके मालाबिइ थःयात थमनं । काकाभाइ दाइ नं थः यात पिथन, थःगु इलय् थः पहलं साहित्यया दबुलिइ-नेपाल साहित्य मन्दिर ख्वप दुनं । सांस्कृतिक ज्याधाः दुने थः यात बवल वयकःलं प्याखं पुचः नाप थः यात स्वानाः ।

बेला, हार्मोनियम व पियानो एकडिंङ्ग अले गबलें टाक्सिकोये बाजं । बाजं थायेगु सीप काकाभाइ दाइया थःगु स्वापू । गन बाजं, अन काकाभाइ दु उबलय् । थौं थें मखया बिइ उबलय् । छम्ह निम्ह जक संगीत विधा दुने दुथ्याना च्वंगु जुल उबलय् ।

काकाभाइ छमा तुसिमा थें लतरम्म तुसि यगगाना सइ च्वंगु मा थें । तुसिमां थें यक्को कचामचा कः घाना मुना च्वनी काकाभाइ । नेपाल साहित्य मन्दिर जक मखु, काकाभाइ दाइया गःसिं । आपलं नेगु संस्थात दु वया । व अन नं दु थन नं दु । सकथासं गन म्ये, भजन, प्याखं, ख्यालि, नासः पुचः आदि आदि दु ।

थः यात उख्यरं थुख्यरं हवतुहवलाः काकाभाइ दाइनं थः यात थः दुने पिना थकल । हवल्य् मसय्कं, हवल्य् मफय्कं लुया मवइगु पुसाया स्वभाव-गुण काकाभाइ दाइनं चायेक थू । थुइक चाः । हवलाः च्वनी थः यात उख्यरं थुख्यरं । लिमलाः फमलाः नयेत्वने भुतुलिइ, देने सुकूलिइ । छगू सेवा भावया पलं । छगू पहः थः यात हवलाः कतः यात बवलकेगु कुतः ।

थाकु मचासे पलाः छिनां च्वनेगु लँजुवाः पहः छगू काकाभाइ जीवन । बुलुहुँ बुलुहुँ घुसुहुँ घुसुहुँ न्ह्यानां च्वनी

काकाभाइ । गन तित्तिं मन्हुसें बुलुहुँ बुलुहुँ मदिक्क पलाः दु अन काकाभाइ । सलथें ब्वां मवनेगु पकः वया । खराचा थें तित्तिं न्ह्याः ब्वांवनेगु पलागं नं मदु काकाभाइया । थः दुनं थः घाना जुइम्हा काकाभाइ । मतापं बुलुहुँ घुसुहुँ ।

नेपाल साहित्य मन्दिरया मोहनि बिस्का इलय् पिदानिगु साहित्य, संगीत व कला कुञ्जं दुनं काकाभाइ दाइनं थः यात हवलाः प्रतिसरा बुइकल । काकाभाइ खनेमदुगु पुसा । प्रतिसरा उकिया दुनं हवःगु छपवः स्वाँ । तताः जु ला प्रतिसरा स्वाँ हवयेकम्ह माली ।

मां अबुया कीर्तिमान मचाखाचा छपवः स्वाँ । व नं पल्यस्वाँ थें दुनयं या छगू मुखू । गन प्रतिसरा दु, अन काकाभाइ व तता जु दु । गन स्वाँ दु अन सौन्दर्य दु । गन सौन्दर्य दु अन आनन्द दु । गन आनन्द दु अन म्वायेगुया पहः चहः दु । गन म्वाये थें म्वायेगु पहः चहः दु थन लुमन्तिया नस्वाः दु ।

थौं थें चासे वइ च्वनी । काकाभाइ दाइनं बेला कियाः म्ये हायेकूगु जितः । जिमि पाजु विज्ञान बहादुर मल्लया चक्कं चुक्य् गवयागु नेपाल साहित्य मन्दिरया दुबुलिइ ।

“भननन पिरतिया बाजन थायेका जिमि लाछिइ म्हितः वनेवाः ।”

म्ये हालागु । छ्यलं थुकुथुकु हःपाः (प्रेरणा) बिउबिउं जिगु सः यात थ काकां न्ह्याकुगु पहः काकाभाइ दाइया । छथु नं महकुसें हःपाः बिइगु नाइसे क्यातुसे पहः छगू काकाभाइ दाइ । थौंनं भलभल लुमंसे वयांच्वनी ।

“तेजेश्वर भाइ छिं म्ये च्वःसा जिं लय बिइ” हःपाः थुकथं पिदनिइ ।

हः पालं मन पिन्हयाइ । थौकन्ह्य् थवयात उत्प्रेरणा धाइ थें उत्प्रेरणा सिर्जनाया पुसा जुयाबिइ । तेजेश्वर नं ला मनु थथे थवइः

“संयोगया म्यें हाले जिं बियोगया बिगुल प् छं ।”

काकाभाइ दाइनं लय तया हाःगु म्ये दुने जि दु । जिगु दुने काकाभाइ दाइ । लुमन्ति छुं काकाभाइ दाइ लिसँया थुगु छिकपिन्त किगः, स्वाँ, सिन्ह व छफुति नीलः ।

# थालमा, सुलमा, कुलमा व नन्ददेव जुजु

- प्रा.डा. पुरुषोत्तम लोचन श्रेष्ठ

## न्हपाया खाँ

ख्वप देया दशवी लाक तः माही त्वः दः । थुगु त्वः या लागाय् विशेष याडः उत्तरप्राचीनकाल (लिच्छवी काल) निसँ उत्तर मध्य काल (मल्ल कालया लिपांगु चरण) तकया थी थी (अनुपम) ज्वः मरुगु भौतिक सम्पदात दः । भैल देगः या चाकलिं च्वंगु संवत ८८ (वि.सं.७२१) या लिच्छवी लिपिं कियो तःगु भरापांगु उत्तरप्राचीन कालया ल्वहँयाय् जलपात्र, उमा महेश्वरया मूर्ति ((सातौं शताब्दी) भैल देगः निर्भय देवया पालाय्या ने.सं. १२५ (वि.सं. १०६२) या नेपाल भाषा दकलय् न्हापां छयलः तःगु न्हापांगु ल्वहँपौ, तिलमाधव नारायण देगः (विक्रमया हिंन्यगू-हिंस्वंगू सदिं) ऐसामारी सत्तः (काष्ठ मण्डप, विक्रमया हिं न्यगू/स्वंगू सदिं) नेपः देशय् वीर शैव/लिङ्गायत पिनिगु छगूयां छगू जक प्रधान मठ जङ्गम मथ हिंन्यगू/स्वंगू सदिं) तिलमाधव नारां द्योयाथाय् च्वंगु भवखाद्यः (नेपः देशय् छगूयां छगू जक बाराही (बराह) द्यो या छत्राकार शैलीं दयकः तःगु ल्वहँया देगः, भूगोल देगः (हिंप्यंगू/डागू सदिं) नेपः या दकलय् तः जगु व खुल्ला जक बिकः दयकगु विशाल डातापोल्लँ देगः (वि.सं. १७५९) जगन्नाथ देगः (हिंप्यंगू/डागू सदिं), शक्ति नपांया शान्त भावया तस्कं दुर्लभगु मूर्ति लक्ष्मी नरसिंह देगः (हिंप्यंगू/डागू सदिं) थजगु अपलं अपः देग नपां थव नं हाँ उलि चर्चाय् मवगु अथे हे दुर्लभ थालमा, सुलमा, कुलमा नांया शिवलिङ्गत नपां नन्ददेव जुजुया प्रस्तर (ल्वहँया) मूर्ति (विक्रमया हिंस्वंगू सदिंया न्हापांगू पला) तः खः ।

## सुलमाः

सांस्कृतिक भूगोल काथं स्वयगु खःसा तः माही त्वः या विशेष याडः भैल देगः, तिलमाधव नारांद्योया देगः नरसिंह देगः, निसँ दक्षिण पूर्वया ब्वः (भाग) गः हिति त्वः खः गुगु २५ डिग्री कोणं क्वथ्याड वाडः च्वंगु दः । गुकिया दकलय् क्वय् बिस्का जात्राबलय् ल्योसिं थानिगु थाय् योसिं ख्यः, भद्रकाली पीठ जुयो (हनुमन्ते) खौँहि खुसी चुपिं घाटय् थ्यनि । गः वांथाय् गालय् दयकः तःगु हिति जूगुलिं उकिता गः हिति धःगु जुड् दक धाय् फः । थव हे गः हितिया चाकलिं छँ या दशवी तस्कं काथं मछिंगु चिच्या ब्यागु थासय् छगू तः जगु थाय् दयकः छज्वः महाद्यो (शिव लिङ्ग) तयो तःगु दः । वहे महाद्योता आनायाय् पिसं सुलमा दक धाय्गु या (चित्र सं १) । चाकछिं छँ दःगु खुल्ला आकाश, दुनयया चुकः ता नेवः तय्सं 'ननि' धाई । सुलमा महाद्यो व हे ननिया दशवी ला । उकिं उगु ननिता सुलमा ननि जक धःगु खः । सुचुक च्वंगु धाय्गु खाँ काथं नेवः भाषं 'सुला' जक धाई । सुल 'मा' या 'मा' खं महाद्यो दक सिङ्के फः । थव महाद्योत सुचुक च्वंगु अवस्थाखं 'सुला च्वंगु महाद्यो' धाय्गु चलन दः । सुलमां वहे खाँ धायो च्वंगु दः ।



किपा १: सुलमा, सुलमाननि



## थालमाः

सुलमा ननिया पूर्वपाखय् उत्तर दक्षिण ताः हाडः वांगु योसिं ख्यलय् वानय्गु छगू तँकगु गल्ली लाँ छपु दः । सुलमा ननि व गल्लीया लाँ पुलय् धुनय् वं पूर्वपाखय् थ्यनिगु मेगु ननि थालमा ननि खः । थुगु ननि नं छँ छँ या दशवी दुनयँ चुकय् छगू तः जःगु थाय् दयकः छगः महाद्यो तयो तःगु दः । थवहे महाद्योता आना च्वंपिसं थालामा जक धाड्गु । (चित्र २) तः जःगु थाथ्यागु च्वयया थाय् दयकः तःथायता नेवः भाषाँ थाथु' जक धाई । थव महाद्यो नं अथेहे च्वय् लाम्हा जूगुलिं 'थालमा' जक धःगु खः ।



किपा २: थालमा, थालमाननि



## न्हयः च्यागूगु स्वप पौ, बःखि पौ(पाक्षिक)

### कुलमा:

थालमा ननि भातिचाजक पूर्व पाखय् तँ क्वहँ वानकिं थ्यनिगु थाय् कुलमा ननि खः । कुलमाननि च्वयया नेगू थाय् स्वयो चकांगु तःब्यागु व क्वय् पाखय् ला । उगु ननिया दशवी छता जःगु देगः छगः नं दः । उगु देगः दुनय् निस्वाडः तः गु महाद्यो 'कुलमा' खः । (चित्र३) उगु शिव लिङ्गया जरुं (जलाहरी) नाग बुट्टां छाया पिप्यो हिड तःगु दः । क्वय्याता नेवः भाषं 'कुने' क्वनयँ जक धाई । कुलमा महाद्यो सुलमा व थालामा स्वयो क्वय ला । अथे जगुलिं थुगु महाद्योयाता कुलमा व ननिता कुलमा ननि धःगु खः ।



किपा ३ : कुलमा, कुलमाननि

कुलमा महाद्योया लिक्क स्वथाय् नं पःख मुइकः तःगु छगू चकांगु थासय् द्योत तयो तःगु दः । (चित्र सं.४) उगु थासय् फुक्क धाय्थें छगू नं छगू थासय् तज्यागु गणोद्यो, मातृदेवी, म्हवेखा गयो च्वंम्हा कुमार, सुजद्योपा, प्यपा लाहादःम्हा नारां द्यो नपां उमा महेश्वरया पुलांगु ल्वहँया मूर्तित नं दः । थुगु द्यो द्युकः तः गु ल्वहँया द्यो याय्के बियो तःगु प्रतिमा लक्षण त स्वयबलय् उमा महेश्वरया मूर्ति उत्तर लिच्छवी कालया दकलय् लिपापाखय् व मेपुं द्योचात पूर्व मध्यकालया न्हापांगु इलय् (हिंछगू/न्यगू) सदियाय्पुं दक धाय् फः ।



किपा ४: कुलमा ननिया खण्डित कलाकृति

अथेहे कुलमा महाद्यो देगः व उगु देगया हःनय् खल्लँ (जगति) छगः पुलांगु तुंथि नं दः । उगु तुंथिया च्वय् चाकलीं ल्वहँ तं क्वपुयो तः थाय् चाकलिं नेपाल (प्रचलित) लिपि नेवः भाषं आखः कियो तःगु दः ।



किपा ५ : ने.सं. ८९८ या ल्वहँ पौ

भाय हिलाः ने.सं. ८९८ वि.सं. १८३५ चैत्र वदि ११ या दिनसं सिद्धि नारां कंगाचा जुं थुगु तुंथि चाकलीं ल्वहँ तयगु ज्या यागु जुल । भिं जुयमः ।

- सिद्धिनारां नुं थौं स्वयो २४० दाँ हाँ उगु तुंथिया च्वय फलय् चाकलीं ल्वहँ तगु धायो तः काथं व नं यक्व हाँ हे आना पूर्व मध्य काल पाखय् वा अथे धाय् कुलमा महाद्यो निः स्वांगु इलय् पाखय् हे तुंथि दः धाय्गु खाँ सिय दः ।

### नन्ददेव जुजु:

थालमा, कुलमा व सुलमा ननिया महाद्योया स्थलगत अध्ययन स्वीदा हाँ हे याडागु खः । अलय् चिच्या-चिच्या क्वगु ननि दुनय्या सुचुक च्वं थें च्वडः च्वंपुं काचाक्क पिनयया संसारं लुइके नपां मफयकः सुचुक च्वंथे च्वड च्वंपुं अलय् उकिया लिक्क भन हे सुचुक च्वंपुं मेमेपु नितान्त महत्वपूर्ण सम्पदाया बारे जिं सिहे मसिया । थौं स्वीदा लिपा स्थानीय पासापुं (विनोद राज शर्मा, केशव तमखु, पुरुषोत्तम

तमखु) नपां खवप नगरपालिकां दानय्गु ज्या न्ह्याकगु लक्ष्मी नरसिंह देगः स्वः वानयगु इवलय् थुकिया चाकलीया सम्पदात नं तुलनात्मक अध्ययन याडः स्वयबलय् अभ्म स्यल्लागु ग्वाहाली जुई धाय्गु बिचलं वि.सं. २०७८ साल मंसिर २६ गते शुक्रबार खुनुँ वहे महाद्यो थाय् नं स्वः वाडः अध्ययन याडा । अलय् सुलमा ननिया अध्ययन याय्गु इवलय् भिसिंद्योया मूर्ति ल्यूनयँ काचाक्क सुननं मखानिगु, ख्युंसे च्वंगु थासय् कः पिचाय् काकः तःगु सुचुक च्वंगु थासय् थुम्हा नन्ददेव जुजुया ल्वहँया इवातां (मूर्ति) अकस्मात लुयो वगु खः । (चित्र संख्या ७/८) । श्व छगू न्हँगु खोजता श्व जिगु तहांगु उपलब्धी काथं काया ।

सुलमा ननिया महाद्यो च्वः जायकः थाथ्याथाय्, मेगु देगः या या हःनयया आंगः नपां धयपुकः तःगु दः । उकिं क्वय नं स्वयबलय् उम्हा महाद्योता स्वयबलय् उखयया देगः या ल्वहँ गःजु नं खानय् दै (चित्र सं. १) स्वयो दिसँ । जिं स्थानीय पासा पिन्के न्यडा "व छु देगः या गःजु थें ?" वयक पिसं व भिं सिं द्योया देगः जक धायो दिल । खवपया भिसिंद्योया स्थलगत अध्ययनयां न्हा हे याय धुंगु खः । अलय् थथे छँ छँ या दशवी उकुस मुकुस जुइकः सुचुक च्वंम्हा थें च्वडः च्वंम्हा भिसिंद्यो धःसा जिता न्हँगु हे अनुभव जुल । जिं छक स्वः वानयन्तु धाया । बरु गनानं वानय्गु खः ? आना द्वहँ वानय्गु लाँ हे मरु थें च्वं । उखय्या छँ क्वय नं वानय् मालि थें च्वं । अथेहे जुयो च्वना । उखय्या छँ हरिरन्त सिंखा (८१) याय्गु खः । वयक आनासं च्वडः च्वंगु जिमिसं उगु देगः स्वयता वयककय् न्यडा । वयकलं ज्यू धायो जिमिता उगु देगः क्यनय् यंकल । (चित्र सं ६) अलय् उकिया बारे महत्वपूर्ण खाँत काडः तहांगु गुण याडः दिल । वयकता अपलं सुभाय् ।



## न्हयः च्यागूगु स्वप पौ, बःछि पौ(पाक्षिक)



किपा ६: भिसिंघो नपां नन्ददेव  
जुजुया स्वालि

भिसिंघोया देगः छता जक जःगु ल्वहँतं जक दाडः तःगु पश्चिमपाखय् स्वयो च्वंगु दः । थजगु शैली स्वरुपया पुलांगु ल्वहँ देगः जिं नेपाल मण्डलय् गनां हे मखाडा नि । श्व जिगु अध्ययन मगागु नं जुयफः । न्ह्याथय् थजु उलि स्वय मदैगु, काचाक्क गनां मदैगु श्व अतुल्य देगः या गर्भ स्थानया हनयँ हे भिसिंघोया आलीढमुद्राया ल्वहँ या देगः तयो तःगु दः । उगु मूर्तिता च्वय् निसँ क्वय् थयंकः स्वय धुंक उकिया दुनयया ल्वहँ व थाय्त चाकलीं मिखा वाय्का । गनां उगु देगः या बारे च्वयो तःगु ल्वहँ पौ तः दः ला जक । छाय् धःसा जिता व भिसिंघोया मूर्ति स्वयो उगु पुलांगु देगः लं मनय् धौ बजी वायकः बिल । जिं हरिरत्न जु याय्के न्यडा- 'थाना गनां श्व भिसिंघो व देगः या बारे च्वयो तःगु ल्वहँपौ त गनां दःला थें ?' वयकलं लिसः बियो दिल- अजगु शिलापत्र थाना गनां दःगु यां जिं मसिया, मखाडा । अलय् श्व भिसिंघो न्ह्यूहा, देगः जक पुलांगु खः । श्व भिसिंघो जिमि बाज्यापिसं थाना लिपाजक निःस्वांगु

खः । भिसिंघोया ल्यूनयँ नं तस्कं पुलांगु छगू मूर्ति दः । व मूर्ति नन्द देव जुजु याय्गु खः । (चित्र सं ७, ८) । व तस्कं पराक्रमी जुजु खः । वयकया उजं मकः सँ यलया करुणामय (मच्छेन्द्रनाथ) या जात्रा भोतो क्यनिगु जात्रा नं न्ह्याकि मखु । वयकया उजं मकसँ मगा । थुकिया बारे समाजय धायो वयो च्वंगु लोकया धापु नं वयकं कडः दिल ।

थालमा, सुलमा, कुलमा  
नन्ददेव राजाया आज्ञां  
जिं भवत क्यने ताडा ॥



किपा ७: नन्ददेव जुजु



किपा ८: नन्ददेव जुजु वि.सं. १२०३-२४

हरिरत्न सिंखाजुं क्यडः द्युगु नन्ददेव जुजुया मूर्ति व वयकया बारे कांगु खँ इतिहास, संस्कृति व पुरातत्वया ल्याखं

विशेष महत्व दः गु खः । उगु स्वालि न्हिनय हे मता मच्याकः खानय् मरु । उगु स्वालीया म्हाछिं किपा काय् नं काथं मछिंकः तयो तःगु दः । व जुजुया म्हाछिं खानय् दय्क स्वयतायां भिसिंघोया मूर्ति आनानं चिड्कय् मनि । थुगु स्वालीया क्वय् पाखय् भातिचा थुड तःगु थयं मथयं अथेहे ७०x३५ से.मि. दु-ब्या दः थें च्वं ।

धात्थें स्वयहे काथं मछिंक तयो तःगु नन्ददेव जुजुया स्वाली बुलुहँ ज्यलः पाता ल्याहाँ वय् धुंकल । धात्थें उगु मूर्तिया ख्वः अपलं ज्यल वान । अथेसां वयागु ख्वः सियदःगु छगू काथं दृढभाव शान्त, सौम्य, गम्भीर, ओजस्वी भाव व पुष्ट सुडौल जिउ वयागु राजकीय ब्यक्तित्व काथं दाड च्वंगु बांलाक हे सिय दः । कपालय् विशेष मटु (मुकुट) ब्वहलय् तक थयं । हनय्पाखय् सिमाहः थें च्वंगु च्वयपाखय् चुस्स च्वंगु बुट्टां कियो तःगु दः । अजगु घरानिया नं फियो व युद्धय् शिरस्त्राण याडः च्वंम्हा छम्हा वीर योद्धा वा सेनापति थें च्वं । वं कम्मरे स्वंगू तहया विशेष प्रकारया बुट्टा दःगु जनि (पेटी) चिडः जिउया च्वयया भाग खुल्ला तयो तःगु दः । अलय् वं लप्पाय् पुष्पकेयर, ककुतय् नेवा कण्ठहार व न्हय्पय् ककुतय्तक थयनिथयं च्वंकः स्वंपवः बुट्टा दःगु ख्वातुगु कर्म कुण्डल तियो तःगु दः । नेपाल मण्डलया पूर्व मध्यकालीन ल्वहँया मूर्ति खय् दैगु शैली व लक्षण नन्द देव जुजुया थुगु मूर्तिसं खानय् दः । थुकाथं स्वयबलय् भीसं उगु मूर्तिता छति हे शंका मयासँ विक्रमया हिंस्वंगू सदिं पाखय्या न्हापांगु चरणया खः दक धाय् छिं ।

थुगु ल्वहँया स्वाली नन्द देव जुजु सुखः ले ? इतिहासया मिखालं स्वय बलय् श्व तस्कं महत्वपूर्ण खानय दः । नेपः या इतिहासय् मन क्व सः पुं न्ह्याम्हा नं मनु तय्सं च्वयया खँ नुगलय थां सा नन्द देव जुजु सुखः ? धाय्गु न्हयसः या लिसः क्वय



## न्हयः च्यागूगु स्वप पौ, बःखि पौ(पाक्षिक)

ल्यं दःगु खौ धाय् हौ हे पक्का नं छुं नं छुं सिय धुकुगु जुयमः । स्थानीय लोक जीवनय् नन्ददेव जुजया नामं लोकं ह्वाम्हा उगु ल्वहँया स्वाली व आनन्द देव जुजु या शासन काल वहे इलय् तुं खानय् दः वः । थुकाथं स्वयबले उम्हा नन्ददेव जुजु विक्रमया हिस्वंगू सदिंया न्हापांगु चरण पाखय्या तस्कं प्रतापि, शक्तिशालि नांदां म्हा जुजु आनन्द देव (वि.सं. १२०३-२४) हे खः दक मिखा तिसिडः धाय् फँ । आनन्द देव या बारे कुल बिडुगु ऐतिहासिक सामग्रीत (अभिलेख, हस्तलिखित ग्रन्थत, गोपाल राज वंशावली नपां मेमेगु वंशावलीत) अपलं अपः दः , व सामग्रीखय् वयाता नन्ददेव वा आनन्द देव दक धायो तःगु दः । नीदाया थःगु शासनकालय् वं केन्द्रीय शासनता दकलय् बलाकला (बज्राचार्य, धन बज्रः २०६४ गोपाल राज वंशावलीको ऐतिहासिक विवेचना, कीर्तिपुरः नेपाल र एशियाली अनुसन्धान केन्द्र, पृष्ठ ४७-५२) देया रक्षा याडः जनताता नाश मजुइकः ख्वप देशय् त्रिपुर राजदरवार दय्कः ख्वपदेता नेपः दे या राजधानी दयकगु वया शासन कालया दकलय् बांलागु ज्या मध्ये खः । लिपाथयंकः लुमाडः वैगु काथंया वयागु ज्यायाता देशबासी पिसं नुगलय् थाडः तःगु दः । उकिं हे गोपाल राजवंशावली च्वम्हासँ तस्कं च्व छायो वयागु बारे थथे हना बना याडः तःगु दः । (बज्राचार्य, धनबज्र, मल्ल कमल प्रकाश १९८५ दि गोपालराज वंशावली फ्रान्स स्टेनर वरलाग, बेशवाडेन जि.एम. वि.एचः पत्र २४/२५ अनुदित पृष्ठ ८०-८१)

माघ कृष्ण सुचन्द्रमा प्रतिपदे सप्ताधिके षष्टिके, काले वर्षशतद्वये शुभदिने राज्यं म्वर, प्रापितो । श्रीनेपालाः समस्तमण्डलमहीत्राता प्रजानासनम् पडियं शास्त्र तदा सुनिर्मितगुणे श्रीनन्ददेव प्रभुः ॥

राजा श्रीआनन्ददेव वर्ष २० तेन भक्तपुरे शिवलस्थाने देवालये देवद्वयञ्च प्रतिष्ठितम् ॥ ताम्रशंखलीसंछादनम् ॥ त्रिपुरसहित राजधानी प्रतिष्ठितम् ॥ राजकुलसमीपे सुवर्णपनाली कृता ॥ श्रीनेपाने महामण्डलीकमहापात्रप्रमुख समस्त

प्रजादीनान्पुत्रपौत्रादीनां गृह, क्षेत्र, ऋयविक्रीतितङ्कृत्वा ॥ संपातदुःखागिन, अपीडिताहृदयानि । चवंगप्रवतः सरोपकेतानाम् चोरकदम्बकय् निहत्य कृता महात्मन कृतम् ॥ तेन शुक्रदिने नाटिक सुधनपाल कृतवान् ॥ त्रिपुर सप्तगण्ठकूट कृत प्रतिष्ठितञ्च ॥

(नेपाल संवत् २६७ (वि.सं. १२०३) माघ कृष्ण प्रतिपदा सोमबारया शुभ दिनसं जुजु श्री आनन्द देवया राज्यभिषेक यात । व सकल नेपाल मण्डलया रक्षा यात, प्रजाता नाश मजुइक, सुखं तला, दुःख फुकला । शास्त्रकाथं ज्या याइम्हा थजम्हा गुणी जुजु श्री आनन्ददेव जुल ॥

आनन्ददेव वर्ष २० । वं ख्वप देशय् शिवलस्थानय् देगलय् नेम्हा द्यो प्रतिष्ठा यात । सिजपौलं चिता । त्रिपुर नपांया राजधानी नं दय्कला । 'राजकुल' थिडकः लुँ हिति दय्कला । श्री नेपालय् माहामण्डलिक महापात्र आदिनिसँ सारा प्रजाया काय्, छय् तक्या छँ बँ न्याय -मिय दःगु ब्यवस्था याता । दुःखः बाधा मजुइगु याता, ..... खँ तय्ता सखाप याडः महात्मां याइगु ज्या यात । वं शुभ दिनसं सुधनपाल प्याखं च्वयो क्यना । त्रिपुर सप्त गढठकुट दय्कः निःस्वानय्गु ज्या नं याता ।

गोपाल वंशावली च्वम्हासिनं आनन्ददेवता 'नन्ददेव' जक मधसँ आनन्ददेव दक धायो हे च्वछाला । थुकाथं आनन्द देव व नन्ददेव धायम्हा छम्हां तुं खः जक धाय्फः । धात्थेगु खाँयां व देश बासीपिनिगु दशवी 'नन्ददेव जुजु' नामं लोकं हवा । लौकिक जीवनय् लिपा थयंकः थ्वहे नामं नां चलय् जुयो वःगु सियदः । नन्ददेव जुजुया ल्वहँया स्वाली थ्व खाँया छगू ज्व मरुगु दसु खः ।

नन्ददेव जुजुया ल्वहँया मूर्ति (स्वाली) दःगु थासं नेपला प्यपला उखय् पाखय् उत्तरे तीलमाधव नारायण स्थान दः । पश्चिम स्वयो च्वम्हा तिलमाधवनारांद्योया देगः लिंक प्राचीन नेपाल (प्रचलित) लिपिं च्वयो तःगु हिंच्याध्वया अभिलेख दःगु छगु गरुदस्तम्भ दः । आनन्द

देवया शासनकालय् श्री रामुनिया छयभाजु पुण्यात्माया काय् शंकरं थः जहान तेज लक्ष्मी नपां च्वडः बिष्णु भगवानया द्यो थापना यागु खौ उगु स्तम्भ लेखं सियदः । उगु स्तम्भ लेखसं आनन्ददेवता थथे च्वछायो तःगु दः । (बज्राचार्य २०६४ पृष्ठ ४९-५०)

पृथ्वी नृपे सकललोकहृदं बहुसे युक्ता प्रशासित रिपुद्विपकेशरीन्द्रे । विते गुणैर्जगति चन्द्रकलावदातैः श्रयानन्ददेव इति सूर्यकस्तूरप्रदीपे ।

(सकल दुनियाँया मन त्याकम्हा, शत्रुत सखाप याम्हा, तिमिलाथे यच्चुम्हा थःगु गुणं याडः संसारे नां जम्हा सूर्य वंशया मता थजम्हा जुजु श्री आनन्द देवं राज्य याडः च्वंगु इलय् ... ।)

आनन्द देव महाद्योया तहांम्हा उपासक 'परमशैव' खः । राजकुमार जुयो च्वंगु इलय् हे वं काशी नं नेपालय् शिवधर्म प्रचार याय्ता वम्हा आमर्दक परम्पराया अग्निमठया शंकराचार्य पाखं शिक्षादीक्षा काला । थ्व खौ राष्ट्रिय संग्रहालय् छाउनी दःगु ने.सं. २६४ या शिलालेखं सिय दः । उगु ल्वहँपौति नं वयाता नन्ददेव जक धायो तःगु दः । नेपः या नां जःम्हा इतिहासकार नपां लिपिविज्ञ जिम्हा गुरु धनबज्र बज्राचार्य जुं उगु ल्वहँ पौ न्हापा तः माही पाखय् च्वंगु लिपा तिनी राष्ट्रिय संग्रहालय् यंकगु धायो दय्गु खौ थाना न्हिथानय् बहज् । उगु ल्वहँ पौ या छुं अंश थथे दः । (नेपाल ज्ञानमणि, २०४३, पशुपति नाथको दर्शन स्पर्शनपूजन सम्बन्धमा समीक्षाः काठमाण्डौः महेशराज पन्त, पृष्ठ ४९,५६।)

अस्थां श्रीरघवंशमौक्तिकमणि (जातो जना) नदंन सान्द्रश्चन्द्र इवान्वितोतिमधुरैरानन्ददेवः करै । उच्चैः शक्तिधरः कुमारपदवी प्राप्तोपि तैर्दीक्षितो (दान्तः सिद्धिमवर्ण) नीयमहिमा प्राप (त्परा) मैश्वरी

(थाना नेपालय् रघु वंशय् मौक्तिकमणि थजम्हा (जनताता आनन्द बिडम्हा) तुइजलां थिम्हा तिमिला थें जः म्हा आनन्ददेव (खः) राजकुमार पद (यौवराज्य)



## न्हयः च्यागूगु स्वप पौ, बःछि पौ(पाक्षिक)

दयो तस्कं बल्लाग्हा जूसां योगी पिन्के शिक्षा कायो तहांगु महिमां जायकः च्वंम्हा वयकं ईश्वरीय परमासिद्धि नं जुयो दिल । (बज्राचार्य २०६४, पृष्ठ ५१) दक च्वता ।

थुगु न्हंगु खसराज्याया सैन्य शक्ति बल्लाड वांसेलिं थुगु राज्य नं भन भन छयड तः ववयो वान । केन्द्रया शासकपिनिगु लागिं थव तस्कं खतरा खानय् दयो वगु जुल । अलय् शङ्कर देव, शिव देव, आनन्द देवया शासन बल्लासेलिं खसपुं पूर्वपाख्य हज्याडः वयमफूत । कर्णाली प्रदेशे खस राज्याया प्रभूत्वदयो वांसेलिं गण्डकी प्रदेशे धःसा आनन्ददेव पिनिगु प्रभूत्व तस्कं बांलाड च्वंगु जुयो च्वना धायगु हस्तलिखित ग्रन्थ विशेषयाड सिज पौ खं सिय दः ।

पूर्व मध्यकालय् पश्चिम मगरातमेगया पन्नगविषय (जिल्ला) नं गण्डकी प्रदेशे हे लागु खः । यगु पन्नग विषयया ने.सं. २८२ या सिजापौ सं वयाता नेपालया अधिपति दक थथे सम्बोधन यागु दः । (बज्राचार्य २०६४ पृष्ठ ४९, ५१)

सेयोस्तु ॥ सम्बत् २८२ मा ग र्ग शि र शु क ल पु ण णा मा स्या रोहिण्याङ्गारदिने ॥ राजाधिराज परमेश्वर प र म भ टा र क । श्रीनेपालाधिपति श्रीमदानन्ददेवस्य विजयराजे । ...'

कल्याण जुयमः । ने.सं. २८२ (वि.सं १२१८ मार्ग शुल्क पूर्णिमा मंगलबार रोहिणि नक्षत्रया दिनसं राजाधिराज मरमेश्वर परममद्वारक नेपालया अधिपति श्री आनन्द देवया विजय राज्यसं ।)

नेपः या शासकपुंमध्ये 'नेपालाधिपति' या पदवी कःम्हा न्हपांम्हा आनन्देव हे खः । वं थव पदवी काय मःगु या मूँ खौँ बज्राचार्य जुं थथे धायो द्यगु खः ।

ने.सं २८२ या उगु सिजपौ सं आनन्ददेवता 'नेपालाधिपति' धायो तःगु दः । आनन्द देवता 'नेपालाधिपति' धायो च्वयमःगु मूँ खौँ उब्लेया अवस्थां नं छुं छुं खौँत नं

दः । अखय् कर्णाली प्रदेशे खस राज्य निस्वांसेलिं थुखे नेपाल केन्द्रया शासक आनन्ददेवपुं तस्कं सावधानी जगु खानय् दः । थथे जूसेलिं आनन्द देवपिसं कर्णाली प्रदेशे थें गण्डकी प्रदेशे व मेगुप्रदेशे नं खस तयता लिचवः लाकय् मवियगु काथं कुतः यागु खानय् दः । गोपालवंशावलीया च्वमिं 'श्री नेपालसमस्तमण्डलमहित्राता' धायो आनन्ददेवया वर्णन यागुलिं उगु खौँ सिय दः । उगु सिजपौ आनन्ददेवता 'नेपालाधिपति' धःगुलिं नं वहे खौँ खं खः धाय् फः । अः नेपालया धात्थेम्हा अधिपति आनन्ददेव खः धायगु केनयता उगु पदवी हछ्यागु खानय् दः । छाय् धःसा थवनं हौँ या अभिलेखय् हस्तलिखित ग्रन्थ (लाहातं च्वया साफू) सं उब्ले जुजुपिन्ता 'नेपालाधिपति' दक बः बियो च्वयो तःगु खानय् मरु । आनन्ददेवया पालाया थवहे अभिलेखसं दकलय् न्हःपां 'नेपालाधिपति' खौँगवः छ्यःगु खानय् दः । थवहे प्रशङ्ग लिपा मल्लाकालय् 'नेपालाधिपति' पदवी कायता यँ-यल- ख्वपया जुजुपिसं हानथाप यागु खौँ लुमांके बह जु । अथेहे आनन्ददेवके 'नेपालाधिपति' पदवी स्वाय् हःगु या हुनि नं वहे अभिप्रायखं खः धाय्फः ।

भौगोलिक मिखालं स्वय बलय् यँ, यलाय स्वयो ख्वपया बस्ती उत्तरय् कासाँ खुसी, दक्षिणय् खौँह (हनुमन्ते) खुसी घेरेयाड तःगु तः जाय्क डाँडा जुयो च्वंथाय् प्राकृतिक दुर्ग दःगु थाय् खः । उब्ले इलय् ब्यलय् हताल (लडाई) अपलं जुयो च्वनिगु इलय आनन्द देवं ख्वप दे ता हे छाय् राजधानी ल्यला धाय्गु खौँ स्पष्ट जू । वं राजधानी ख्वप देता छगू बल्लागु किल्ला काथं दय्कः सेना व देशवासीया मन ववसायकः तान्त्रिक हिसावं नं दे रक्षा याय्गु मतिं देशं दुनय् व पिनयँया उगतमातृका देव गृह/पीठ नपां शहरया दथ्वी त्रिपुर सुन्दरी पीठ + देव गृहया नवदुर्गा पीठ निस्वाना । (श्रेष्ठ, पुरुषोत्तम लोचन २०६०, भक्तपुरको नवदुर्गा गण, भक्तपुर बबिता श्रेष्ठ, पृष्ठ १५-२२) तःमाही त्वः या भैल द्योया चिच्या जःगु

देगः वहे जुजुं दय्क गु धाय्गु वंशावली दः । वहे भैल द्यो व भैल द्योया शक्ति त्रिपुर सुन्दरीता ख्वप देया दथ्वी साल ह्यो ख्वप देता तस्कं ब्यवस्थितगु राजधानी काथं दय्क राजनीतिक प्रशासनिक काथं जक मस्व सें धार्मिक साँस्कृतिक न्ह्यलुवा काय फःगु साँस्कृतिक केन्द्र काथं नं वहे जुजुं निस्वाना । नेपाल मण्डलं तस्कं डाय्किगु स्थानीय व राष्ट्रिय महत्वया जात्रात, नखा-चखा डाय्केता जुजु नं वयमःगु जुजुया उजं काय मःगु राजकीय नेतृत्वया साँस्कृतिक परम्परा थवहे जुजुया पालाय निसें यागु खः धाय्गु खौँ भ्नीसं नकतिनि जक सियागु 'सुलुमा, थालमा, कुलमा, 'नन्ददेव जुजुया आज्ञां जिं भवत क्यने ताडा' खौँ खं सिय दः ।

यलया च्वःजगु साँस्कृतिक म्हासिद्धका ज्वडः वयो च्वंगु भवत क्यनिगु जात्रा नेपःया छगू लोकं हवागु जात्रा मध्ये खः । थुगु जात्रा स्वयता स्वनिगः या सर्वसाधारण निसें जुजु/राष्ट्र प्रमुख नपां स्वः वङ्गु चलन दः । वि.सं. २०६३ सालय् नेपालय् राजतन्त्र मद्यातिं भवत जात्रा खय् राष्ट्र प्रमुख वयो, स्वयो जात्रा न्ह्याकगुलिं थुगु जात्रासं राजकीय निरन्तरता मदिकक वयो च्वंगु खौँ थुङ्के फः । तान्त्रिक विधि-विधान नपां साइत स्वयो लभांख्यलं जाहवला ख्यलय् मच्छेन्द्र नाथया रथ लुयो हःगु दकलय् लिपाया दिनसं मच्छेन्द्र नाथ (बुंगाद्यो/करुणामय) नं थः कय कायो तःगु नासो हिरामोती रत्नं जःगु जुजुया उपस्थितिसं छम्हा राजकर्मचारी मच्छेन्द्र नाथया रथय् च्वय्या प्यकुनय् दाडः यक्व यक्व जनसमूहता क्यडः जिके दुः, सुयाकें जिगु खः धङ्गु दसि दः सा काः वा ' धायो प्यंगू दिशाय्तुं क्यनिगु चलन अः तक दः नि ।

लोक परम्परा व वंशावली काथं, भवत जात्रा गथे जुयो याय् माला धाय्गु छगू न्यँ कँ बाखं नं दः ।

टौदहया नागराज कर्कोटकया नागरानीया मिखा स्याबलय् छम्हा ज्यापु नं



## न्हयः च्यागूगु स्वप पौ, बःछि पौ(पाक्षिक)

वास याड लांक ब्यूसेलिं लयतायो नागराजं धनदौलत नपां उगु रत्नं जःगु भवत नं छपा नं बिल । व भवत नं सुनं खुयो यंकला मसिल । छन्हू मच्छेन्द्र नाथया जात्रा स्वः वांबलय् व ज्यापुं थः ता ब्यूगु वहे रत्नं जःगु नं छम्हा मनुं (भूतं) फियो वगु खाड आना हे 'आमु नं जिगु' धायो ल्वापु थल । अलय् न्ह्यागु याडानं ल्वापु मज्यंसेलिं उगु नं करुणामयता नासो तयो सुनं दसि प्रमाण है वाता वियगु धायो जिम्मा तयो तकगुलिं दाच्छीया छक सुयायगुं खःसा दसि ज्वडः कः वा दक (भोटो) भवत नं क्यनिगु जात्रा थौ तक न्ह्याक वयो च्वंगु दःनि ।

थुगु जात्रा गुब्ले निसें न्ह्याकगु खः धायगु धात्थेगु ऐतिहासिक सामग्रीत मलुनि । इतिहास, संस्कृतिया छगू लिधंसा समाज्य धायो वयो च्वंगु खाँत नं खः । न्हपा -न्हपा निसें न्ह्याक वयो च्वंगु नखा-चखा, जात्रासं भाषा ल्हाय, पाः फय्, जुजुया उजं ल्हाय, धायगु थजगु म्हुतुं न्ववाइगु तस्कं बांलागु अलय् सत्य खाँ नं खः । 'थालमा, सुलमा, कुलमा, नन्ददेव जुजुया आज्ञां जिं भवत क्यनय् ताडा' नं थुगु खाँया अपवाद मखु । भवत क्यनिथाय् जुजु मवासें मगागु राजकर्मचारी जुजु/राष्ट्रप्रमुख वयालिं भवत क्यनिगु स्वयबलय् थुगु जात्रा पक्कानं जुजु आनन्द देव या पालाय् थयं बलय् तस्कं लोकं हवाय् धुंगु जुयमः अलय् दायँ दायँ पतिक्या मच्छेन्द्र नाथया जात्रा भवत जात्राखय् थः हे वाडः स्वइगु धायगु खाँ नं सिय् दः । थथे स्वयबलय् थुगु जात्रा नन्ददेव जुजु स्वयो यक्व हाँ निसें डाय्कः च्वंगु खानय् दः । अथेहे भवत जात्राया अभिप्राय (मति) व ल्वापु ज्यंकय्गु पहः द्यो व जुजु याडगु निपं खं मध्य युगीन न्याय व्यवस्थाया छपुलु' काथं थुकिं क्यं । (हरिराम जोशी (२०६०) नेपः या चाडपर्व, ललितपुर, जोशी रिसर्च इन्स्टिचूट, पृष्ठ ५५) दक च्वता ।

प्राचीन कालय् छुं नं खाँ निर्णय काय थाकुलकिं ल्वापिन्ता द्यो या हनय् यंकः पाः फय्किगु चलन दः । वहे काथं भवतया खाँ क्वः छिय मफू सेलिं उकिया लागिं

धर्मराज काथं विश्वास याड तःम्हा मत्स्येन्द्र करुणामयया उगु जात्रासं राजा थः नं सवारी जुयो व नेम्हा भगडियापिन्ता थः थः गु दसि प्रमाण ज्वड वयगु राजाज्ञा (राजाया उजं) जूगु खः । अलय् उगु भवतः थःगु दक : द्योया हःनयँ पाः फय् मछः सेलिं उगु भवत नं करुणामयया जिम्माय् लाडं तु च्वन । अलय् दायँ - दायँ पतिकं सुयायगुं खः सा कः वा धायो क्यडः च्वंगु भवतं मध्यकालीन नेपः या न्याय व्यवस्था गथे च्वं दक क्यडः च्वंगु खः धःसां पाइ मखु ।

सुलमाननि नेगः, थालामा ननि व कुलमा ननि छगः छगः याडः प्यंगः महाद्योया अर्थ भावपूर्ण काथं पूर्व पश्चिमय् छसिकाथं निस्वांगुलिं नं भीसं तः माही, गःहिति लागा न्हपानिसें हे पवित्र शैव तिर्थ स्थल काथं हज्याडः च्वंगु मति वां । अपलं अर्थ छ्याय् ज्यूगु, प्रतीकवादी मिखालं सुलमा, कुलमा थालमा स्वर्ग, पृथ्वी व पाताल काथं अलय् प्यम्हा महाद्यो दसिकाथं संसारया सृष्टि संहारया इलय् वहे भगवान शिवया त्रिगुण प्रधान स्वंगू बिस्कं बिस्कं नां (सत्+चित्त+आनन्द- सच्चिदानन्द) जुइगु काथं व स्वंगुं तुं गुण नं बिस्कं हे परम तेजोमय ब्रह्मपदय् च्वनयथे जुइगु लिं हकनं बिस्कं नामं अमिता पुकारय् याइगु वया चतुर्विभ नामं प्रमुख काथं दः । अपुं खः १) भव-उत्पतिया ई व रजोगुण प्रधान नां २) हरसंहारकालय् तमोगुणप्रधान नां ३) मूड-स्थितिकालय् सत्वगुणप्रधान नां ४) शिव-स्वंगुं गुण स्वयो पाकः च्वंगु तेजोमय (जोशीः हरिरामः२०५८ अभिनव संस्कृति कोष, ललितपुरः नवीन्द्रराज जोशी, पृष्ठ ९१) सुलमाननि, कुलमाननि व थालमाननिया प्यम्हा महाद्योत नं थुकिया स्थल्लागु दसु खः धायफः । आनन्ददेव भैल देगः लुँ हिति नपां मेमेगु देगः त नं दय्कगु खाँ ऐतिहासिक सामग्रीया लिधंसाय् सिइके फः । उलिमध्ये छुं छुं न्हिथानय् वहेजु कृति शैली लक्षण व प्राचीनताया मिखालं वयागु हे इलय्या थ्वहे सुलमा, थालमा व कुलमा शिवलिङगत नं खः धायगु मति वां । सायद थःगु

शासनकालय् तस्कं न्हिथानय् बहगु अपलं ज्या पूर्वांकय् फःगुलिं नन्ददेव जुजुता थें सत्+चित्त+आनन्द जुल, वहे काथं व नन्ददेवं आनन्ददेव जूगु खःला ? थ्व जिगु मनया खाँ जक खः । अलय् ख्वपय् थथे कुलमा, सुलमा व थालमाया परम्परा न्ह्याडः वयो च्वंगु दः । अजगु हे परम्परा यलय् नं न्ह्याडः वयो च्वंगु खानय् दः । यलय् च्वंगु उथे उथेगु हे नांया महाद्योत सुलिबुँ नलिबुँ बलिबुँ व कुलि बुँ नं खानय् दः । गुगु मध्यकालीन यलया नां जम्हा विद्वान पण्डित गयो जुजुया इलय् निःस्वांगु धायो तःगु दः । (संस्कृति शिरोमणी हरिराम जोशी धायो द्यूकाथं) यलया उगु परम्परा राजधानी ख्वपया परम्पराया लिचवलं निःस्वांगु खानय् दः ।

यलया व प्यम्हा महाद्यो विशेष याड भाद्र शुल्क त्रयोदशीनिसें आश्विन कृष्ण प्रतिपदातक छसिकाथं पूजा याइगु परम्परा दः जोशी, २०५८, पृष्ठ ५६२ ख्वपय् धःसा शिला चहे (शिवरात्री) खुहुँ सामान्य पूजा याइगु बाहेकं मेमेगु पूजा परम्परा मयाय धुंकल ।

जुजु आनन्देव (वि.सं. १२०३-१२२४) या पालाय् यक्षमल्ल (वि.सं. १४२८-१५३९) या पालाय् तक अथे धायगु नेपाल मण्डलया राज्य ब्वथलय् हाँ तक (३०० दा स्वयो अप दा तक) ख्वप दे नेपः या राजधानी नगरकाथं हज्याडः च्वंगु खः । उकिं राजनीतिक, प्रशासनिक काथं जक मखुसें सांस्कृतिक ल्याखं नं ख्वप दे स्वनिगः या सांस्कृतिक दुकदुकी जुयो च्वंगु खः । राजनैतिक काथं क्वचा थलय् धुडानं ख्वप दे नेपाल मण्डलया सांस्कृतिक काथं मू थाय् हे खः । छाय् धःसा ख्वप दे पाखं क्वचा थयो यँ यल बिस्कं राज्य काथं खानय् दःसां, न्ह्याम्हा न्ह्याखय् स्वसां फुक्क मल्लतय्गु वंश यां छगू हे खः । फुक्कसिया मूल राजकीय वासस्थान सांस्कृतिक मूल थलो नं आखिर ख्वप दे हे खः । उकिं यँ व यलया लोकं हवागु जात्रा, राजकीय उत्सव, संस्कार विधिविधानत ख्वप दे या मदय्क मगागु सांस्कृतिक -राजकीय





## न्हयः च्यागूगु स्वप पौ, बःधि पौ(पाक्षिक)

प्रतिनिधित्व यां जुइगु हे जुल । थुकिया छगू बांलागु दसु यलया करुणामयया भवत क्यनिगु जात्राता नं काय् फः । दायँ-दायँ पतिकं जुइगु करुणामयया जात्रासं ख्वपय् नं 'खड्ग' मयंक तलय् रथ-न्हयाकी मखु । अथेहे दायँ दायँ पतिकं मच्छिन्द्र नाथता न्हवन (महास्तान) याकि बलय् नं ख्वपय् नं खड्ग यंकय् मः । (नेवारी:रामजि धन बज्र बज्राचार्य (सं) २०२१ ऐतिहासिक पत्र संग्रह काठमाण्डौ नेपाल सांस्कृतिक परिषद पृष्ठ २०) उगु इलय् गुळ्ने गुळ्ने ख्वप दे व यलया दश्वी थाक थुक जुइबलय् उगु खड्ग यंकिगु खायँ कचिक पिइगु । अलय् अजगु कचिक: मपिइकेता ख्वपया जुजु जितामित्र मल्ल, व यलया जुजु योग नरेन्द्र मल्लया दश्वी नं सं ८१६ (वि.सं १७२०) सं छगू सन्धिपत्र हे जगू दः । (ऐजन, पृष्ठ ३०) च्वयया खायँ मू खौं छु दलय् धःसा ख्वपय् नं विधिपूर्वक खड्ग ज्वडः वानिम्हा सांस्कृतिक मनुता 'नन्ददेव जुजु' धाय्गु चलन दः । भीसं च्वय् न्हिथाडागु खौं थुकाथं स्पष्ट जू ।

### दकलय लिपा:

छु नं इलय् गुगु नं शासन सत्ता क्वदयो, मदयो वांसां नं उगु इलय् हाँ काय् धुंगु संस्कृति न्हाडः वानि मखु । व परम्पराकाथं छुं नं छुं काथं न्ह्याडः हे च्वनि । ख्वयो वाड थयं मथयं मदइथे हे च्वनय् धुंकगु सुलमा, कुलमा थालमा व नन्ददेव जुजुया परम्परा श्व खौंया छगु स्यल्लागु दसु खः । सुलमा ननिया हरिरत्न सिंख्वाल जु याता हकनं छकः सुभाय् दे छासे कुलमा, सुलमा थालामा ननिया खौं नपां नन्ददेव जुजुया ल्वहँया स्वाली क्यडः लोक प्रचलनय् न्हपां निसं धायो वयो च्वंगु खौं काडः तः हांगु गुणयाड दिला । थुगु बचाः हाकगु अध्ययन दुने सुचुक च्वंगु थुकिया बारेया इतिहासया अभिलेखिकरण याडः न्हँगु खौं पिब्वय खांगुलि मनय् अपलं सन्तोष जगू दः । च्वयया खौं बिचः याडः ख्वप देशं यलया मत्स्यन्द्र नाथया जात्रा न्हयाकय्ता खड्ग ज्वडः वानिम्हा नन्द देव जुजु (ख्वप देशं वड्महा जगुलिं ख्वपः द्यो नं धाई ।) अथेहे भवत

क्यनिगु जात्रासं नेपः या राष्ट्र प्रमुख पिनिगु उपस्थिति व वया अनुमतिसं राजकर्मचारी भवतो क्यनिगु परम्परां ख्वप देता थी थी मिखालं नेपाल मण्डलया मू थाय् काथं बल्लाक , भिंक, बांलाकः राजधानी दय्कम्हा वहे ऐतिहासिक जुजु आनन्द देव व वयगु न्हयलुवाया उजं राजाज्ञां छकः भीता न्वँ वई । व छम्हा उल्लेया निर्माता काथं काय् फः (बज्राचार्य) २०६३, पृष्ठ ५४) ख्वप देता नेपः या नुगः थें स्वाडः चिरकालिक भौतिक अभौतिक सम्पदां बल्लाक ख्वप देया गौरव च्वछाय्ता ज्या सांम्हा लुमांकय् बह म्हा जुजु ।

पुरातत्वका ल्याखं गना बस्ती दुनयँ नं खुसी चा न्ह्याई आनानं मानव सभ्यता न्ह्यागु धाय्गु सिय्दः । ख्वप दे नं थथे हे जलया ब्यवस्था याडः दय्कगु किरात कालीन बस्ती खः । थुगु खौं पुष्टि याइगु न्यगू प्यंगू आधार तः दः । लिच्छवी कालया अभिलेखय् च्वयो तःगु खौं गः 'तिलमक' खुसीचा वा खौं गः ता स्वयबले उल्लेया जनभाषा खौं गः जक धाय् फः । (बज्राचार्य, धन बज्र २०५३, लिच्छवीकालका अभिलेख, कीर्तिपुरः नेपाल र एशियाली अनुसन्धान केन्द्र पृष्ठ २६९-७०) । 'तिलमक' खौं गः वलं भीता थौं या तः माही, गः हिति त्वः या लागाय्ता खौं कानी । गना उल्ले खुसी चाः बः वयो च्वंगु दः । तः माही त्वः या न्हपा धायो तःगु नां 'तलमण्डे' खः । वहे 'तलमण्डे' नां उत्तरमध्यकालय् व बलय् तलमण्डे, तवमण्डे (गोपाल राज वंशावली २९, ४७, ५१, ५६ पानासं) जुयो आधुनिक कालय् वयो तःमाही, टौमढी जू वल । थथे स्वयबलय् थौं या तः माही उल्ले 'तलमण्डे' नां या तिलमक खुसिया स्वापु दः धाय्गु क्यं । अः नं बुढापिसं न्हपा थाना धः चाः बः वड्गु धयो च्वंगु खौं खं श्व खौं पुष्टि याई ।

तः माही त्वः या दक्षिण पश्चिम पाखय् तालाक्व मथ दः । ख्वप नगरपालिकां उगु मथ ल्हवंगु इलय् आनाया जगखण्डय् खुसीया फि, पाँचा व ल्वहँत लुयो वगु खः । (स्थलगत अध्ययन) अः नगरपालिकां दाड च्वंगु लक्ष्मी नरसिंह देगया जगय् नं अजगु

हे अवशेषत लुयो वगु खः । स्थलगत अध्ययन सुलमाननि वानय्गु गल्लीया थिइकः छँ दां बलय् नं जगय् अथेहे अवशेषत लुयो वला । गः हिति भेलु छ्यलय वानय्थाय् भैल खः यंकिगु खः लायँ ल्वहँ तं सियो तःगु नेखय् सिथय्या धःचा पक्का नं भैलख यंकेता जक मखु वहे खुसिया (धः) बः वांकय्ता नं दय्क तःगु सियदः । थथे थुगु पुरातात्विक अवशेषया लिधंसाय् च्वयया बस्ती बः वड्गु धः चा वा खुसिया तः माही जुयो बः वानिगु गुगु गः हिति, बोलाछँ तालाक्व जुयो क्वय हनुमन्ते (राम मन्दिर) खुसी जू वानिगु धाय्गु सिय्दः । श्व खौं न्हिथानय् मःगु या खौं तः माही त्वः या पुलांगु शैवः वैष्णव सम्पदा नपां कुलमा, सुलमा, थालमा हे खः । नाः न्हयाथाय्या थाय् पवित्र धाई । उकिं हे श्व थासय् भैल देगः, तिलमाधव नारायण, सुलमा, कुलमा, थालमा नपां नरसिंह देगः नि स्वांगु खः जक धाय्फः । गना अपलं शिवलिङ्ग दै आना पुखु वा खुसीचा, खुसीया संगम वा त्रिवेणी दै धाय् फः । (वहे ननिया लिक्क लिक्क नेगः पुखुचा नं दः)

तः माही गः हिति त्वः या पूर्व प्राचिन कालय् निसं दुर्लभ सम्पदा दः । थानाया गुलिं सम्पदात खुयो यंकय् धुंकल, गुलिं वास्ता मयासं तः सेलिं तज्याड, पाः पा ब्वल वयो क्वचाज्यडः च्वंसां सुन्दरता धःसा अजनं कः घाडः च्वंगु दः । हलिमय नां जःगु डातापोल्हँ देगः नं थाना हे दः । अथेनं थुगु थायया गहन अध्ययन याडः न्हँ न्हँगु खौं पिताहःगु खानय् मरुनि । नन्ददेव जुजुया ल्वहँया स्वालिया हकनं गहन अध्ययन मयासं मगा धाय्गु मति वां । गनां आना उल्लेया इतिहास उलक्यनिगु ल्वहँ पौं नं ल्हाडः च्वंगु दः ला ? फुक्क स्वापु दःगु निकाय व उगु थाय्या बासिन्दा पिन्ता जिं दुनुगलं निसं इनाप याय् । दकलय् न्हपां भीसं उगु सम्पदा म्वाकः तय् उकिं भीगु भिं याई नपां सम्पदा संरक्षण उगु थाय्या अध्ययन अनुसन्धान मथां हे याय्ता जिं इनाप याय् ।

# नेव समाजय् कय्गु या स्थान

आशा कुमार चिकंबाजार



स्व निगः अन्न उब्जनीया ल्याखं अन्नया धुकुती धःसां मपा । श्व छगू समृद्ध दे काथं म्हासिद्धिका पिब्वयो वयो च्वंगु दे जगुलिं थानाया चा व फय् दुनयँ ब्वलांगु तजिलजि, संस्कृति भीगु थःगु मौलिक संस्कृति खः मधः सें मगा । छगः तः हांगु पुखु नागदह न्ह्यागु थजु थानाया नाः चालः वांसेलिं श्वथासय् फुक्क काथं बस्ती योग्य जू धाय्गु थुइक हे थाना बस्ती निः स्वांगु खानय् दः । इतिहासया कालखण्डय् गोपाल वंशी +महिषपाल+किराँत काल लिपा लिच्छवी कालया इतिहास स्वयबलय् मनूया विकास नपां संस्कृति नं विकास जगु खानय् दः । श्व हे इवलय् इव छु छु संस्कृतिया छवपाः भन भन चकाडः वल । अलय् मल्ल कालय् थयं बलय् वहे चकांगु ख्वालय् चिकं बुय्गु, सिन्हं तिय्गु, न्हयपतय् तिसां तिय्गु, साँकुलि तय्गु याथे संस्कृतिता छायापिय्गु याड हल । वहे समायाय्गु इवलय् संस्कृति नपां नसा त्वँसा नं छ्यलय्गु याडः हल ।

नेवः समाजय् जन्म निसें मृत्यु तकया संस्कारे कय्गुया थी थी धाःसा मदय्कं मगा । मचा बुइबलय् ब्वचा बजी छायात्ता निसें श्राद्धबलय् कडासा मदय्कं मगा । उकीं बुइबलय् निसें सी बलेतकया नेवः संस्कार नपां घितुघिडः वयो च्वनिम्हा कय्गु याता अन्नया जुजु जक हे धाई । कय्ता पुजा, इहीं, बाहा, इहिपा (ब्योह) ज्या वा न्ह्यागु लसतां पूजा या भव्यबलय् भव्य क्वचाल दकः सिसाबुसा काथं च्वय्क वइम्हा कय्गु नेवः संस्कारे दकलय् च्वय्ला ।

स्वनिगलय् मंसिर-पुसया इलय् कः हवलय्गु याई । कःबायाय्ता नाः अपः म्वः धायो कःबापु छ्वबापु स्वयो तः पुक काई । अथे कः बापु काइबलय् धःसा चाः तछ्याइबलय् छ्यनय्

## न्हयः च्यागूगु स्वप पौ, बःछि पौ(पाक्षिक)

बलय् डानिगु काथं जुयमः गनां गनां धःसा वा ख्वँः तय् हे नं कः हवलिगु चलन दः । थथे याइ बलय् कय्गु अपलं बखुं नं नयो विइगुलिं कः वापु कायो हे कः हवलय्गु याई ।

कः हवलय् धुकः बुयो वयानिं उकिता कःच जक धाई । अलय् कःचः बचाः हातकिं कः चः कताड नय्मः धायो कःचः कताडः तरकारी नै । श्व कःचः ब्वजा धःसा माघे सङ्क्रान्ति बलय् नैगु चलन दः सा अः कः बा मयासेलिं श्व संस्कार बुलुहुँ तडः वांगु खानय् दः । कःच ब्वजा नःसा दाछीतक सांगु नःगु पचय जुई धाई ।

कः मा भातिचा तः माय् वं कःच बु वय हाँ कः बाय् कःमाः ता छ्वः तिय्गु धायो थी थी सिमा कचात, मल्लामा, भान्तामा अनेक गःसि तय्गु याई । चाः नाइसा लाहातं, अपलं गांसा लुसिचा वाडः छ्वः तिय्गु याई । छ्वः लिसेंतुं कःमा थागयो वाडानिं उकीं वैगु कःबु तस्कं हे बांला खानय् दै गुम्हां गुम्हां सिनं कःबु नं नय्गु या : । अथेनं कःबु मस्यकसिं जोगेयाड हे तै । छायाधःसा कःबु स्वहे कः छँ प्याहाँ वैगु खः ।

कःबु ब्याय् धुकः कः छँ प्याहाँ वसेलिं थमनं पिडागु अन्न द्रहँ वइन धायो बुँ ज्यामिया मन चं चं धःसां कछँ तस्कं साइगु जगुलिं कःपुयो खुयो नैपुं नं अपलं दैगुलिं कः बाय् प्य वानय् मालय् यो । कःछँ पाकय् जुलकिं कःपुय्गु धायो कःपु यो छगू चकांगु थासय् हयो कः दाय्गु याई , कः दाय्ता ताः ता हाकगु मगचु बः पुगु नोक् कछि खं दाय्गु याई । गुगु नोक् कछि न्हपा कः दाय्धुकः छँ काः, कापः अनेक पाय्ता कःसि जतनयाड तयो तै ।

कः दाय्गु तस्कं थाक्गु खाँ भी नेवः समाजय् 'कःदः थें दाय्' धाय्गु खँ त्वा खँ भाय् खँ नं सिय् दः । दथी कः तयो चाकली नोक् ज्वडः पालंपः कः दाइगु स्वयबलय् धःसा स्वय हे हायँ पुसे च्वं । कः छँ जूबलय् कछँ नय्गु गुलि साइगु खः कय्गु जुयानिं उलि साइ मखु ।

कः दाय् धुकः फय्कः कः गलि जुको छखय् लिइकः कय्गु जक म्वयो छँ हयो सय्कः पाय्गु याई । कय्गु पाइगु इलय् कय्गु सांकः वानि बलय् कय्गु खय् चुलुयो दय्यो नं धाई । उकीं नेवः समाजय् म्वलः छँ जिगु लायँ कय्गु पाय् म्वलः दकनं धाई । अलय् अपलं छ्याक्व पिन्ता जूसा हेपेयाय् थें व मखाना सितला द्यो याय् यो म्हा ख्वालय् कय्गु पाय् ज्यूम्हा दक नं हिस्पाय् थें धाय्गु नं या । अलय् सः गु कय्गु तेपचाय् तैगुलिं धेपचा पिन्ता 'कय्गु तेपचा' जकनं हाय्केगु या ।

कय्गु नेताजि दः तगवः कय्गु व चिच्या गवः कय्गु । तगवः कय्गु अपलं कःसु निड कडासा दय्की सा । कः बाला याडः कःसु कैँ खुनि । अथेहे कडासा निडः व छुय्गु नं याई । न्हपा न्हपा गुथि पः फँ बलय् पलंचां दाडः व छुय्गु याडः बामनाया छमनाया छपा व छुकः थय्केगु याई । अः धःसा श्व खःला खः



## न्हयः च्यागूगु स्वप पौ, बःछि पौ(पाक्षिक)

जक याडः छ्वयगु याडः हल । अल्यु ब्वः छ्युगुलि कडासा धःसा मदयुक मगा । चिच्या र्वगुं कयगु धः सा ब्वः व सिसा बुसा तयता अपलं छ्यली ।

अल्यु मेगु छताजि कयगु धःसा न्या कयगु दक धाई । न्ह्याक्वः फ्वयो तः सां माहां मबुइगु, न्हियु बलय् न्या थें न्हियु थाकु इगु, किरिकिरी च्वनिगु जूगुलिं सुं नं नहुन्या पुं मचात दः सा अमिता न्या कयगुचा जक धायगु या । गुथि बलय् मदयुक मगागु व या बारे व छ्यु मफयो अपलं कोर फय्मःगु व पा तःपा चिच्यापाया खायँ अपलं ल्वापु जूगुबाज्या पिसं कड तकगु न्यन्यु बलये अः वयो नयगु स्वयो वायगुअपः थें जुयो थुकिता म्हवँ याडः यंकसा त्वः तः धःसा तकगु मरुनि ।

लाजा ल्वसा, मुस्या ल्वसा स्वयो कः डासा ल्वसा दकलय् च्वजः । कयगु फ्वयो कःसु थचुक, निचुक ल्वमार्यँ निडः दय्किगु ल्वसा दैबलय् जाः छपे उपः क्वहँ वां धाडपुं अपलं दः । अल्यु श्राद्ध बलय् जक मखु मू मू भव्यखय् प्याकिसाके, फसिगुलि-फसि चु नपां कडासा मदयुक मगा । गुकिता थः म्हा भैलद्यो काथं कायो गुम्हासियां दथ्वी गुम्हासियां नेव्व खय् तैगु चलन दः । अल्यु श्राद्ध बलय् कःसु कँ व मार्यँ कँ मदयुक मगा । उकिं नं पितृ मुक्तिया ज्याखय् मदयुक मगागु कयगुया परिकार नेवः समाजय् दकलय् च्वः जःगु जुई ।

सिति नखा बलय् व मनसँ मगा । सितिनखाया वः न्य धुकः अनेक अशिल्ल भौ कायगु चलन नं दः । थुगु कयगु याता हन्यु तयो रसिकता व रतिरागात्मक खॉत तयो अशिल्लता हालयगु चलन दः सां उब्बे उकिता सहज काथं हे काडगु खाडः च्वडा । सितिं साति वापिज्या याय् हाँ व नयो न्ह्याकगु सिन्हाज्या सामाज्या सःत पायँ साति वालेज्या धायो कयगु माडः म्हवसुसे च्वंकः भ्यो तं छभ्यो ब्वः तकय् हैम्हा सिया मन गुलु तुथें कयगु नं पाखुयो काय मससा गुलु तुल वानय् यो । उकिं कयगु जक मखु थी थी ब्वः गथे याडः नय्म धायगु चलन नेवः तय्के दः । कयगु जक अपः नलकिं प्वागवः र्वः धाई, अल्यु पचेयाय् थाकुइ दकः कयगु ब्व अपः नयमते जक नं धायो तःगु दः । उकीं वाचा फाराफारा च्वंकः श्वाक चिय धुकः र्वइगु गुन्ही पुन्ही बलय् धःसा क्वाति खय् कयगु मतसिं मगा । थुकीं नं सिय दः नेव समाजय् कयगु गुली च्वः जः दक । विस्काया कछें ब्वजा थजु वा सितिनखाया वः थजु वा गुन्ही पुन्हीया क्वाति थजु केगुं भ्नीगु संस्कारता च्वछायो च्वंगु दः । भ्नीसं कयगु ता च्व छायो च्वडा । उकिं सापारु खुनुं चिच्यागवः कयगु दान विइगु याड तःगु ज्वी ।

कयगु पुसा बचाः माडानिं कःचः, अल्यु कःमा, कःबु, कछें, कयगु कः दाय् धुक कयगु नपां छुटे जूगु कःगलि, कसु बाला अल्यु निडागु कडासा छुडागु वः र्वः र्वः गु कयगु ब्वः न्ह्यागु थःथः कयगुया जन्म कः छिया रुप नपां नां हिल वासां कयगुया महिमा वहे खः । कछें गुलुतुलु नयगुया सबः थौं तक नं पाःगु मरु ।

गनां गनां छ्वबाय्सं कः हवल तैपुं नं दः । आना धःसा च्वय् धाया काथं या ज्या याय् म्वँ । कः पाकय् जुलकिं पुयो ह्यो कः दायगु याई । थौं कन्हे देसी कयगु वयानिं धःसा कःमा नपां मियगु काथंया बुँज्या याडः हःगु खानय् दः । अल्यु कः बाय् वा छ्वः बाय् धः सा 'सुपिकछें' दक अथें हे बुयो वइगु छता जि कः छें नं दः । गुगु सुपिकःछें गुलुतुल नयबलय् न्ह्यो वय् यो दक धःसां सुपी कछें प्वलः नइपुं नं अपलं दः ।

न्ह्याथय् थजु, कयगु ता तुकः तयगु खःसा कयगु सय्कः पाय्मः । अल्यु मसय्क तुं तेपचाय् स्वथानय् यंकसा किलं नयो दुःख बिई । कयगु खय् दैगु की मेपुं थें मखु श्व तुरुन्त ब्वयो वानय् फः । उकीं अजपुं कीलं मथिइक च्वनयगु खःसा न्ह्या हे बुद्धि पू वांकः कडागु लिभालय् सय्क पायगु खॉ लुमांके मज्जू ।

श्व हे कछेंया नामय् उकिया हु बहु मिलय् जूगु कः छें स्वं नं दः । स्वयबलय् हू बहू कयगु ह्वलय् बलय् निसँ स्वं ह्वइबलय् तकया अवस्था अथें तुं खया नं थुकिया माँ धःसा इवाम्म च्वडः तस्कं बांलाई । श्वनं वाँचुगु, तुइगु, ह्योगु याड तःता जि दै । बिस्का जःखः ह्वइगु थुगु स्वं अपलं ख्वपय् द्यो स्वंगं बिइबलय् छायगु याई । मेमेपुं द्यो तयता नं छायगु या । थुगु कछें स्वमा नं गिड वानेयो ।

कः छें स्वं ह्वय् ब्यातकीं उकी सैगु कछें हे उकिया पुसा खः । उगु पुसा जोगेयाड स्वप्याडः तै । वहे कयगु गुलुतुल छगः नेगः पिडः मोहनी हाँ वा मोहनी धुं धुं पू सालिगु खः । श्व मेगु थें माः सारे याडः, कलमि याडः धःसा म्वागु खानय् मरु । उकिं तप्यकं पूसा थुडः हे पियगु याई ।

काचिकं नैगु ब्वः त बकुला, दुरुफुरी लाजा, गुम्हां गुम्हा सिनं मायचा, मुसुचा मुस्या नं नयगु याः सां कः छें थें मन ह्वय्क तस्कं साक नैगु मेगु मरु । लायँ वाँ वाँ, कः छें थु न्याडः लाँ छ्याय्ता कः छें कु कुं नयो वानिपुं मनूत नं खानय् दःसा गनां पासापुं मुडः कःछें थू न्याडः फुक्क मिलय् जुयो कछें कु कुं नइपुं नं दः । अल्यु कः छें या खोला नं तुडः नैपुं नं दः । अः की सिइगु वास हवल तःगु कः छें धायो ख्वला तुडः नयगु भाति भाति म्हवँ याडः हःगु खानय् दः ।

अल्यु कयगु सियो नयगु नं याः । च्वथा बलय् ज्न्या बलय् लाजा मुस्या नपां कयगु नं सियो इडः बियगु चलन दः । नपां स्वस्थानीया बाखा पः नपां नं कयगु सियो बियगु चलन दः । सकिमा पुन्ही बलय् ब्वइगु हलिमलि खय् नं कयगु सियो तयगु या । अल्यु छगू छगू पुरिया याडः कयगु सियो मियो तःगु लाँ छ्याय्ता न्याडः नैपुं नं थौं कन्हे म्हवँ मजु । थुकिया हुनि खः कयगु सियो तः सा ता ई तक थुकिया सबः म्हवँ मजुइगु व सबः मपाइगुलिं खः । अल्यु कयगु फ्वया, कयगु पुकः, ब्व याडः दाल (कसूकँ) खुड, वः छुड, चतामारीया द्योनय् छुड कडासा याडः नः सां ज्यगु कयगु न्ह्याकातं स्वसां उलिहे च्वजः नेवः समाजय् ।



## ख्वप पाखं सय्के मःगु ज्ञान (पाठ)

माघ ६

छु भीसं नेपः या मेमेगु नगरता नं ख्वप दे याय् थें स्वास्थ्यया लागाय् हज्यागु थाय् दय्के मफैला ? भीसं आनाथें हे बांलागु राजनीतिक सुसंस्कारं जायक यंके मफैला ? अलय् सामाजिक विसंगति मदय्कः ब्यक्तिगत स्वार्थ त्वःत समाज व राष्ट्रता चव्य तय् मय्ला ? छु भीसं 'जि' मधसें अजगु मभिता न्ह्यो मानव हित या लागिं तयार जुय् मय्ला ?

धात्थें भीसं नेपः या स्वास्थ्य परिवेशता तथ्यांकया लिधंसाय् स्वय्गु खः सा तस्कं ग्यापुगु स्थिति हः नय् वै । दाच्छिखय् सीइगु ल्या, मचात सीइगु ल्या, मचाबुपुं मां पुं सीइगु ल्या जक मखु न्ह्यागुनं स्वास्थ्यया खाँ कायो स्वः सा व तस्कं क्व ह्यंगु खानय् दै ।

जिं नेपः या स्वास्थ्य अवस्थाता नेगू तहलय् तयो स्वय्गु याडा । न्हः पां स्वास्थ्यया पूर्वाधारत व नेगूगु स्वास्थ्यया जनशक्ति । पूर्वाधारया खाँ ल्हाय बलय् दायें दायें पतिकया वार्षिक बजेटे स्वास्थ्यं दोश्रो व तेश्रो (न्हपांगु शिक्षा व आन्तरिक प्रशासन) लिपा या थासय तै । अलय् उकियाता धात्थें बांलाकः छयलय्गु वा उकिता बांलाक ब्यवस्थापन यागु मरुः वहे ह्विगतं याडः ५० प्रतिशत स्वयो अपः जनसंख्या प्राथमिक स्वास्थ्य सेवा तक काय मखां । थःगु पूर्वाधारत नं ज्या काय् मफयो (प्रसंग- विपिकोइराला स्वास्थ्य विज्ञान प्रतिष्ठान नपांया सरकारी निकायलय् स्वथाडः तःगु करोडौं तका तूगु स्वास्थ्य उपकरणत) स्वथाडः तःगु सामान समस्याता घ्वाःसा बियो च्वंगु दः । सरकारी व अर्ध सरकारी निकायसं जुयो च्वंगु चरम भ्रष्टाचार, अख्तियारया दुरुपयोग

व राजनीतिक अराजकतां छ्वःमि घ्यो लुयगु ज्या याडः च्वंगु दः । गां गामयँ, दुर्गम थासय् सरकार व स्थानीय निकाय खः थें डांक हे मरुगु भी फुक्कसिनं मसियागु मखु ।

मेगु खाँ खः जनशक्ति । स्वास्थ्य उपकरण जक दयां स्वास्थ्यया लागाय् अथें विकास जुइ मखु । उकिता छयलय्ता सःपुं मनूत माल । थुकि नं नेपः दे तस्कं कनाचायपुगु अवस्थाय् दः । चिकित्सक, प्राविधिक मनूत, वास दयकिपुं थजपुं मनूया शक्ति जनशक्ति खः । नेपः मि पुं दक्ष मजपुं नं मखु अलय् धात्थें दक्ष धःपुं विदेशी डलरय् कुकुमाखाथें भुडः च्वंगु दः । थुकि अमिगु जक कमजोरी मखु । थमनं याडागु ज्याया सही मूल्यांकन याय्ता थःगु दक्षताता अः या हिल वाडः च्वंगु समाजय् रुपान्तरण याय्ता अलय् थःगु दक्षताया स्तर च्व जायकेता नं वयकपुं विदेशय् भ्रःगु जुई धाय्गु जिगु अनुमान खः । थुकि नं जिं नीति निर्माता पिनिगु अदूरदर्शिता व भविष्यया अज्ञानताता हे दोष बियमः । नेगू दर्जन स्वयो अपः स्वास्थ्य शिक्षण संस्था दयानं लोभ लालच व सोर्सफोर्स याडः जनशक्ति ब्वलांकयता ..... यागु मति मवांगु मखु । सायद थः नं चिकित्सक जूगुलिं खः ला ।

थ्व च्वयया खाँ जिं देनेसं खाडागु बेथितित जुल । अभ् स्वस्वं वानय्गु खः सा सायद जिगु च्वसाया मसी फूसं अलय् स्वास्थ्य लागया विकराल स्थिति फुक्क हः नय् वै मखु ज्वी । अलय् थः नं थ्वहे लागया चिकित्सक जूगु लिं खः ला अजनं आशया मता धःसा मसिनि । छगू सुदूद व सबल स्वास्थ्य समाज निः स्वानय्गु मति दुनयँ । धायो तः काथं पलेस्वँ नं

- डा. वितेघ न्योपाने



भेतय् खय् हे ह्वई । छम्हा हे मनूया लाहापातिं खयानं उथिं मग्यं उकि जिं जिगु च्वसा ख्वपया स्वास्थ्य स्थिति पाखय् क्यनय् ताडा । सायद जिं जिगु ल्याम्होया जोश नेदा/प्यदा आना हे सेवा याडागु थाय् अलय् जिगु कर्मथलो जूगुलिं खः ला ?

खयां स्वास्थ्य लागाय् आशाय्या छिं पुं मनूत मरुगु मखु, गुम्हासितां गोविन्द केसीया सेवा व समर्पणं लिचवः लाकल ज्वी, गुम्हासितां उपेन्द्र देवकोटाया विद्वतां खःसा गुम्हा सितां स्वास्थ्य मन्त्री गगन थापाया खाँ लिचव लातला । अलय् धात्थें वस्तुपरक अध्ययन याय्गु खःसा त्वाकया घः चुपीं मस्यु' धःथें जिं ज्या सानय्गु संस्थां अनेक समस्या नपां ल्वाडः पंगः त चिइकः स्वास्थ्य समाजय् छगू न्हूगु तला थाकः गु दः । जि नकतिनि थुगु लागाय् पला छिडाम्हा छम्हा ल्याम्होम्हा चिकित्सक अलय् जिगु बिचलं जि जक मखु जि थजपुं लाखौं सिया जोशता न्हयलुवा याइ । जिं थुकिता थःगु सार जकयां धाय मखु अलय् जिं पुं नःगु, सुथाय् छगु तुइजला प्याहाँ वगु जकः मति तय अलय् निभः त्वयानिं च्वाच्वगुं लुँ पाडागु थें बांलाड वगु मति तया । ख्वप देता जिं स्वास्थ्यया लागाय् यागु प्रगति



## न्हयः च्यागूगु स्वप पौ, बःछि पौ(पाक्षिक)

खाडः दकलय् अप्व सम्भावना ज्वडः हज्याडः च्वंगु ख्वप दे काथं हृदाय हे तया ।

थानाया स्वास्थ्य लागाय फुक्क वर्ग गम्भीर रूपं कःगु मति वां थाना दःगु स्वास्थ्य क्षेत्रया पूर्वाधारत थौं स्वयो कन्हे भन ब्यवस्थित जुजुं वांगु व अज च्वजायकः यंकु खानय् दः । थाना छम्हा छम्हा नागरिकया स्वास्थ्यया (सुलभ पहुँच) अः पुक सेवा काय फौगु काथं स्थानीय निकाय, ख्वपया राजनीतिक कःमि पिनिगु चां न्हिं या मेहनत व दूरदर्शिता संसारया मिखालं स्वयो च्वंगु दः । अज थाना स्थानीय थासय् याडः च्वंगु ज्यात गथेकि स्वास्थ्य विमासं सर्वसाधारणया पहुँच, म्हवचा धेबां बहिरंग सेवा अझ च्वछाय् बहजु । छगू छगू वडाय् स्वास्थ्य संस्था दःगुलिं समाजय् स्थानीय सरकारया बांलागु लिचवः लाडः च्वंगु मति वां गुकिं मनूतय्ता स्थानीय सरकारं छुं याइ धाय्गु विश्वास वां । हकनं पूर्वाधारत च्व जायकं यंकः च्वंगुलिं जि थजपुं नकतिनिया मचा ल्याम्होचापिनिगु मनयँ तस्कं बांलागु म्हागस खानिगु पक्का हे जुल ।

चिच्याहासां तस्कं मदय्क मगागु खाँ धाय्थे आजुई थेंकेगु खःसा दकलय् न्हःपां पला मछिसें मगा । पला छिडानिं हे जक आजुई थ्यनि धाय् फै । अजगु अवस्थाय् भीगु स्वास्थ्य स्थिति थ्यनय् धुकल । नेपः या फुक्क स्वास्थ्य अवस्था स्वयगु खः सा ख्वपदेशं स्वास्थ्यया सम्भावना यक्व हे कः घाडः वाडः च्वंगु खानय् दः । छपा लाहातं लाहापा थाय् फै मखु धाय्थे थाना छम्हासिया मेहनतं जक ख्वप दे थौं थाना थ्यंगु मखु । सच्छिता बाजा थासां छगू हे ताल धाय्थे थानाया समाज, स्थानीय सरकार व ख्वपया न्ह्यलुवा राजनीतिज्ञपिनिगु तहांगु लाहा व साथ दः ।

जि मचात बलय् निसें हे नारायण मान विजुक्छें रोहित जुं ज्या साडः नैपुं

ज्यापु ज्यामिपिनिगु लागिं याडः द्युगु ज्यात जिगु मनय् किपालुथें च्वँ वै । केन्द्र सरकार नपां ल्वाडः थजु वा सामाजिक अभियन्ता जुयो थजु ख्वप दे वयकया अभिभावकत्व खय् जुजु धौ थें हे तस्कं माकुयो च्वंगु दः । उकिं हे ख्वपया सामाजिक आधार बल्लाडः च्वंगु । अलय् सुनिल प्रजापति, प्रेम सुवाल थजपुं जुभारु नेतापिसं थुगु विरासत हछ्याडः यंकः च्वंगु दः । जलाखाला जिल्ला यें - यलायें थजगु पाँचतारे अस्पताल म्वँ, ख्वपया जनताता, गुम्हासिं स्वास्थ्यया नामयँ धेबाजक कमे याय्गु स्वई । ब्यापार जक याई । थानाया न्ह्यलुवा पिनिगु चां हिं या कुतलं थानाया सार्वजनिक स्वास्थ्य संस्थां विश्वस्तरीय सेवा बियो च्वंगु दः । थुकिता जिं राजनीतिक सुसंस्कार जक हे धाय् ।

नेपाल मजदुर किसान पार्टी संसदय् विपक्षया भूमिका म्हेत थुगु पार्टी समाजता मःगु आधारभूत आवश्यकता व हक हितया सः न्ह्याब्लें थवकी । उकीं हे थाना सामाजिक विभेद म्हवँ जक, मनूतय्गु चेतना अप्वः गुकिं याडः छगू स्वास्थ्य समाज दय्केता ग्वाहाली जुला ।

हकनं जिगु चञ्चल मनय् खाँ ल्हात, बिचः च्वजाल, अलय् मनय् छगू खाँ बुयो वै । छु भीसं ख्वपय थें मेमेगु थासय् नं स्वास्थ्यया लागाय् च्व जःगु थाय् दय्के मफैला ? छु भीसं अजगु हे बांलागु राजनीतिक सुसंस्कार विकास याय् मफैला ? छु सामाजिक विसंगति मदय्क ब्यक्तिगत स्वार्थ स्वयो च्वजायक समाज व राष्ट्र ता तय मफैला ? छु भी 'जि' धाय्गु त्वः त 'मानव हित' या लागिं तयारी जुय मफैला ?

सन्दर्भ : 'स'

'स' नेपाली वर्णमालाया छम्हा दुजः 'स' या यक्व यक्व खाँव त दः । सोचं खाँ बुइकिगु नं खः । साथ, सहयोग,

सहकार्य अपलं खाँवलं थुकिया महिमा हाल ज्वी । अझ बिचः यायां वानयँ । डाडः च्वजायो वानयगु मति वै । च्वापुगुं थें च्व जःगु थःगु सन्दर्भ ल्यतु मतु ल्यय, ज लुयो वै । थः म्वाय्गु धरातल-सपरिवार, समाज, सकल । अलय् 'स' पाखं वडगु सुख, समृद्धि, शक्ति, शान्ति व सम्पतिया महत्व बिस्कं हे दः । संस्कृति बिस्कं दः । अलय् च्वय् न्हि थाडागु 'स' या फुक्क खाँवः स्वयो दकलय् च्वयया खाँवः जि स्वय् स्वास्थ्य हे जुयमः जिगु विषय बल्ललुल ।

मनू बुसां निसें सी बले तकया परिभाषित स्वास्थ्य मनूया दकलय् तः हांगु धन खः । स्वास्थ्यया नेगु मुख्य पाटा दः भौतिक वाद व मनोवाद धाथें मानव मन व तन स्थिर जूसा वं (कायापलट) जीवन मू पुइकय् फै ।

वस्तुगत काथं थुगु खाँ कानय्ता जिता खाँवः गाइमखु ज्वी । अथेनं जिं जिगु 'स' या सन्दर्भ स्वाय ह्य ताडा । हरेक इतिहास, धर्म संस्कृति नपां उलिहे दुयंगु स्वापु तै स्वास्थ्यं । चाहे व ग्रीक द्यो 'अपोलो' थजु वा हिन्दु द्यो 'धन्वतरी' थजु भी च्वडागु समाजया स्वास्थ्यया खाँ वै । व विशाल सागररूपी भारी शक्तिखः स्वास्थ्य ।

नेपः दे नपां स्वास्थ्य स्वाय्गु खः सा थुकिं अनेक आयामत थी । थुकिता मनूया थःगु मिखां स्वयो नं सामाजिक सुलंचां स्वय सय्के मः । स्वास्थ्य थः हे ॐ ब्रम्हाण्ड खः । थुकिया परिभाषा स्वस्वं वानय्गु खः सा अनेक प्रशंग थी थी उपकरणत स्वाडः वै । गथेकि स्वास्थ्य संख्या, चिकित्सक स्वास्थ्य कःमि पुं, वासः इत्यादि ।

स्वास्थ्य व नेपः या सन्दर्भ ता हकनं 'स' याय् ग्वाहाली मकः सें मगा । सायद नेपः या स्वास्थ्य बांलागु खःसा अथे जुई थथे जुई । न्हयसः तस्क. गम्भीर लिसः सायद वहे 'स' ।

## ख्वप नगरपालिकाया ज्या भवः त

### ख्वप नगरपालिका विपद् व्यवस्थापन केन्द्रं (सी एम सी) क्वः छ्यूगु खाँतः

पुस ३०

ख्वप नगरपालिका स्तरीय विपद् व्यवस्थापन केन्द्र (सी एम सी) या नायो भाजु नपां ख्वप नगरपालिकाया प्रमुख सुनिल प्रजापतिया नायो सुई नगरपालिका स्तरीय विपद् व्यवस्थापन समितिया केन्द्र या बैठक चवन ।



बैठक्य नगर प्रमुख प्रजापति जुं अः तक कोभिडं मथिइकः मपुंकः तयता याडः च्वंगु ज्यात छसिकाथं काडः दिल ।

बैठक्य वयकलं नगरपालिकां १,४१,२३९ डोज खोप बियधुंगु, अक्सिजन प्लान्ट चाय्क तयागु व ख्वप अस्पताल कोभिड युनिट ५० साधारण, २५ एचडीयू याडः ७५ शय्याता तयारी अवस्थाय् दःगु खाँ ब्याक दिल । वयकलं कोरोनाया नेकगु लहरया इलय् न्हपां तुं ब्यवस्था याडः तयमफःगुलीं देशं तहांगु क्षति फय् मःगु खाँ ब्याकसें अजगु खाँ सय्कः सिइकः फुक्कसिया मंकः कुतलं कोरोनाता त्याक्य् फैं धायो दिल ।

थौं च्वंगु नगरपालिका स्तरीय सि एम सी बैठकं नगर क्षेत्र दुनयँ ख्वप अस्पताल पाखं १२-१७ दया मनुतयूता बियो वयो च्वंगु खोप मदिक्क विइकेगु खाँ क्वः छित । नपां न्हपानिसें डाय्कः हाडः वयो च्वंगु चाड, पर्व मेला थजगु संस्कृति नपां स्वापु दःगु फुक्क ज्या इवः तः मः काथंजकः औपचारिकता जक याडः डाय्केता इनाप याय्गु व छँ नं प्याहाँ वै बलय् मास्क मतः सिं प्याहाँ मवय्गु, साभुं-थाडः इलय् -ब्यलय् लाहासिलय्गु, स्यानिटाइजर इलय् ब्यलय् बुय्गु, स्वास्थ्य सुरक्षा मापदण्ड पालना याडः चवनय्गु, सूचं पिबवयो नगरबासी पिन्ता सचेत याय्गु खाँ नं क्वः छित ।

बैठकं कोभिड भवल्वचं मपुंक मथिइकः चवनयूता ब्वनय्कुथित (कलेज/विद्यालय) वैकल्पिक विधिं कक्षा न्ह्याकयूता निर्देशन वियगु खाँ नं क्व छित ।

बैठकं ख्वप नगरपालिका पाखं न्ह्याकः च्वंगु ख्वप अस्पताल कोभिड युनिट तयारी अवस्थाय् तयो तयागु व अः वयो च्वंगु कोभिड १९ या न्हूंगु भेरियन्ट ओमिक्रोन महामारीया जोखिमता बिचः याडः जनताता मःमगु खाद्यान्न (नसा-त्वेसा) थजगु छुनं वस्तुत अभाव मजुइकः तयता मः काथं ब्यवस्था याडः तयता स्वापु दःगु फुक्क थासं ग्वाहाली याकेगु खाँ क्वछित ।

बैठक्य भःपुं नगरपालिकास्तरीय विपद् व्यवस्थापन केन्द्रया दुजःपुं नपां थी थी संघ संस्थाया प्रतिनिधिपिसं कोभिडया थौं या अवस्था व कोभिडं मपुंकः पाडः तय्गु विषय थः थः गु बिचः प्वंकः दिल ।

## निरीक्षणय्

ख्वप नगरपालिकाया प्रमुख सुनिल प्रजापति जु व ख्वप नगरपालिका वडा नं. १ या वडाध्यक्ष श्याम कृष्ण खत्रीजुं चुनदेवी तपाको स्वाइगु दय्कः च्वंगु पक्की ताँ दय्कः च्वंथाय् हे भायो स्वयो दिल ।



न्हयः च्यागूगु खप पौ, बःछि पौ(पाक्षिक)

## खपय् कोभिड विरुद्धया बुस्टर डोज सुरु

माघ ४

कोभिड भवत्वय थ्यं पुं संक्रमितपुं न्हिया न्हिथं अप्वयो वसेलिं खप देशय् थौं निसें (माघ ४) खोप बुस्टर बियूगु ज्या न्हयाकल ।



खप नगरपालिकां न्हांगु चरणो बुस्टर डोज न्हयलुवा जुयो ज्या सानिपुं सफाइ मजदुर (सुचुकुचु ज्यामिपुं) चालक (डाइभर) जनप्रतिनिधि, पत्रकार, सुरक्षा कःमि व नगरपालिकाया

कर्मचारीपिन्ता खोप ब्यूगु खः वहे इवल्य् नेपाल मजदुर किसान पार्टी वागमती प्रदेशया संसदद्वय सुरेन्द्र राज गोसाइँ, सृजना सैजु, उप-प्रमुख रजनी जोशी, खप नगरपालिकाया वडाध्यक्षपुं, कार्यपालिकाया दुजः पुं व वडाया दुजः पुं नपां सकल सिनं थौं माघ ४ गते बुस्टर डोज खोप कायो द्यूगु खः ।

अः तुरुन्त हृदाय च्वडः ज्या सानय् मः पिन्ता जक बुस्टर डोज खोप बियागु खप नगरपालिकाया प्रशासकीय अधिकृत दामोदर सुवालं धायो द्यूगु खः । थौं छन्हू खय् ६५ म्हा मिजपुं व १६ म्हा मिसापुं याड मुक्कं ८१ म्हा सिनं भेरोसेल बुस्टर डोजया खोप कःगु खः । अलय् १३२ म्हा मिजपुं व ६८ म्हा मिसात याडः मुक्कं २०० म्हासिनं कोभिसिल्ड बुस्टर डोज कःगु खः । खोप कःगु मध्ये जनप्रतिनिधि ३१ म्हा कर्मचारी २५० म्हा, उकि मध्ये सुचुकुचु ज्यामिपुं ६३ म्हा, डाइभर ७ म्हा व पत्रकार ४ म्हा मेपुं जनप्रतिनिधि व कर्मचारीपुं खः दक वयकलं जानकारी बियो दिल ।

बुस्टर खोप काय्ता श्वनं न्हापे नेगुं तुं मात्रा खोप काय् धुंगु खुला पुलय् धुंकगु नपां उगु खोपया काडं नं नपां तुं ज्वडः वयमःगु ब्यवस्था दः ।

## निरीक्षणय्

खप नगरपालिकाया प्रमुख सुनिल प्रजापति, प्रमुख जिल्ला अधिकारी रुद्रावेदी शर्मा, महानगरीय प्रहरी परिसरया प्रहरी उपरीक्षक शिवकुमार श्रेष्ठ जु पुं खप नगर दुनयया मेधा मा.वि., विद्यार्थी निकेतन मा.वि. व सैनिक आवासीय मा.वि. नपांया खोप केन्ट्रे भायो थी थी सामुदायिक व संस्थागत विद्यालयया ब्वनामिपिन्ता बियो च्वंगु 'मोडर्न खोप' स्वः भाल ।



खप नगरपालिका वडा नं. ७ या ग्वसालय शनिबार भौरबहीसं पाठेघर (मचाछै) व स्तन क्यान्सर (दुरुप्या क्यान्सर) या परीक्षण जुल ।



ब्हयः च्यागूगु ख्वप पौ, बःखि पौ(पाक्षिक)

## प्र.अ. पुं नपां मेयर जुया जुम बैठक

ख्वप नगरपालिकाया ग्वसालय् ख्वप नगर दुनयँ चाय्कः तःगु सामुदायिक व संस्थागत ब्वनय् कुथिया प्र.अ./प्रिन्सिपल पुं नपां अनलाइन जुम पाखं बैठक माघ ११ गते जुल । बैठकसं ख्वप नगरपालिकाया प्रमुख सुनिल प्रजापति जुं कोभिड ल्वचं मपुंकः, पाडः तयूता ख्वप नगरपालिकां खोप तस्कं बांलाक बिडुकः वयो च्वंगु नपां ख्वप नगरपालिकां १ लाख स्वयो अपः कोभिड विरुद्धया खोप विय धुंकगु खॉ काडः दिल ।



ख्वप देशय् शिक्षाया जग बल्लागुलिं हे थाना ब्वपुं ब्वनामिपिसं च्वजःगु लिच्वः (नतिजा) हय फःगु खॉ काडः दिसे वयकलं सरकारं थः यत्थे स्थानीय निर्वाचनया न्हिः ल्या क्वः छियगु कुतः याडः च्वंगु खॉयँ कुं खिडः दिसे स्थानीय तहया निर्वाचन संविधान व कानुन काथं बैशाखय् हे याय् मःगुलि बः बियो दिल ।

ख्वप नगरपालिका, स्थानीय पाठ्यक्रम छगू तगिं निसें च्यागू तगिं तक दय्कः ब्वंकय् ब्युगु देया न्हपांगु नगरपालिका खः धायोदिसे प्रमुख प्रजापति जुं ख्वप नगरपालिकां शिशु स्याहार निसें कलेजतकया ब्वनय् कुथित चाय्क दांकः, भिंकः, बांलाकः आखः ब्वंक वयो च्वंगु खॉ ब्याक दिल ।

आधारभूत तह परीक्षा समितिया नायो प्रेम गोपाल

## कमल विनायकया बौद्ध चैत्य ल्हवनिगु

ख्वप नगरपालिका वडा नं १० कमल विनायक (यातु गणेश) थिडुकः च्वंगु बौद्ध चैत्य ल्हवनय्-कानय्या लागिं न्यास पुजा वडाध्यक्ष (१०) लक्ष्मी प्रसाद हयोमिखाया पाहाँलय् माघ ३ गते कमलविनायक द्योया हःनय्या खल्लेचाय् बौद्ध चैत्यया हःनय् जुल ।

न्यास पुजा धर्मगुरु भिमरत्न बज्राचार्य व प्राध्यापक पुष्परत्न शाक्यजुं याडः द्युगु खः । विधि तन्त्रं निस्वाडः तःगु ऐतिहासिक बौद्ध चैत्यत ल्हवनय् कानय् हाँ चैत्य थुय प्यन्हँ हाँ उगु पुजा पाठ क्वचाय्के मःगु मान्यता काथं नेपाल परम्परा बौद्ध संघया नायो श्री पुष्परत्न शाक्य जुं धायो बिज्यात । थुगु खॉ बौद्ध सम्पदा विज्ञापिसं नं धाय् बिज्यागु खः । उगु बौद्ध चैत्य दः

कर्माचार्य जुं ख्वप नगरपालिकां च्यागू तगिया परीक्षा भौतिक उपस्थिति हे न्ह्याकय्गु काथं कुतः जुयो च्वंगु खॉ काडः दिसे न्ह्याथिन्योगु पंगः वसां शिक्षण व सिकाई दिकय् मज्युगु खॉ काडः दिल ।

वैठकसं स्थानीय पाठ्यक्रम निर्माण दलया कजि योगेन्द्र मान विजुकुँ जुं ४ गू व ५ गू तगिया पाठ्यक्रमया बारे काडः दिल ।

अथेहे आधारभूत तह समितिया कजि दिपक माकं अनलाइन कक्षा न्ह्याकय्ता थी थी समस्या वयो च्वंगु खॉ काडः दिल ।

सामूहिक परीक्षा समितिया कजि नपां मेधा मा.वि. या प्र.अ. गंगाधर हाडां अनलाइन कक्षा जुयो च्वंगु, खोप त्वः फ्यु पिन्ता अः बिडुके मः धायो दिल ।

अथेहे संयुक्त परीक्षा समितिया नायो नपां आदर्श आजाद मा.वि. या प्र.अ. श्री कृष्ण किर्सी अनलाइन फुक्क ब्वनामिपुं कः घाय् मफूगुलिं भौतिक रुपं हे कक्षा काय मःगु परीक्षा नं मः काथं सुरक्षा उपाय याडः भौतिक रुपं हे याय्मः धायो दिल ।

संस्थागत विद्यालय संघ नेपाल (इसान) या कृष्णाराम त्वानाबासुं सिकाई सहजिकरण निर्देशिका, २०७७ या खॉ ब्वनय्कुथि याय् पिसं थुडुके मःगु नपां अनलाइन बाहेक मेगु उपायत नं स्वयमः धायो दिल ।

प्याब्सन ख्वपया नायो रमेश चन्द्र श्रेष्ठ चिच्या-चिच्याहिपुं मस्तयता अनलाइन कक्षा बांला मजुगुलिं शैक्षिक स्तर भन-भन बाँमलाडः वानय् फःगु लिं स्वास्थ्य मापदण्डे च्वडः भौतिक रुपं पालंपः आखः ब्वंकय्गु नपां १२ वर्ष क्वयया ब्वनामिपिन्ता नं खोप विडुकेता कुतः याय्मः धायोदिल ।

एन प्याब्सन ख्वपया कजि पूण्यराम कवां जुं ब्वनामिपिसं खोप काय् धुंकगुलिं खोप कार्ड स्वयो भौतिक रुपं कक्षा सञ्चालन याः सा जी धायोदिल ।

थाय् न्हपा यातु चैत्य विहार दःगु अभिलेखत दःगु खॉ नं काड बिज्यागु खः ।

उगु बौद्ध चैत्यया लगत इष्टिमेट ९०१३२२/५६ तका दां ल्हवनय्कानय् ज्या न्ह्याकय्ता अनुगमन समिति नं निस्वांगु दः । वडाया दुजः जितेन्द्र मुनकःमिया कजिलय् डाम्हा दुजः दःगु समितिसं दुजः पुं तिर्थमान दुमरु, विकास राज बज्राचार्य, पद्म रत्न शाक्य, सुरेश ज्योति शाक्य जुं दःगु अनुगमन समिति निःस्वांगु खः । उगु ऐतिहासिक बौद्ध चैत्य ल्हवनय्-कानय् याय्ता पुरातत्व विभागं आर्थिक ग्वाहाली ब्युगु व ख्वप नगरपालिकाया मंकः ज्याखय् (सहकार्य) उगु ज्या हज्याइगु धायो तःगु दः ।



## स्थानीय चुनाव मथां जुय्मः

बैशाखे हे स्थानीय निर्वाचन यायमःगु जनप्रतिनिधिपिनिगु मागं सरकारं स्थानीय तहया निर्वाचन गुब्ले याइ ? थुगु न्हयसंः स्थानीय तहले व राजनीतिक छ्यलय् बयबय जुयो च्वंगु दः । संवैधानिक प्रावधान काथं अः वैगु बैशाखे हे निर्वाचन जुय मःगु खः । अथे नं अः तक छुं नं काथं ज्या जूगु खानय् मरुनि । थुखय् स्थानीय तहया जनप्रतिनिधिपिसं धःसा बैशाखं हे निर्वाचन जुयमः दक छप्वा म्हूंतुं धायो वयो च्वंगु दः, (अर्थ न्यूज डट कम)

### सुनिल प्रजापति प्रमुख स्वप नगरपालिका



स्थानीय तहया निर्वाचन संविधान व कानून काथं बैशाखं हे याय्मः । इलय् हे चुनाव मज्जासा प्रतिगमनं हकनं कपः ल्हानय् फः । अलय् जनतां दुःख सिई, देशं दुर्गति फय माली । प्रतिगमन विरुद्ध आन्दोलन याडः प्रजातन्त्र निस्वाडा । अः या संविधान व कानूनं न डादा स्वयो अःप स्थानीय तहया जनप्रतिनिधि पिनिगु म्याद तानय्गु बन्दोबस्त याडः तःगु दः न थव सम्भव हे दः । संविधानं गनां गुब्ले जनप्रतिनिधि खाली मज्जुगु कल्पना याडः तः थाय् स्थानीय निर्वाचन मयासैं मगा । सुनं निर्वाचन याय् मखुनि धःसा प्रतिगामी खः । जनतां ल्वाडः हःगु प्रजातन्त्रता हकनं शेरबहादुर देउवां जनप्रतिनिधि विहिन यात धःसा जनतां वाता थुकलं बिई । उकिं चुनाव जुइधाय्गु मतिं भ्नी वानय् मः । अः माओवादी व एकीकृत समाजवादी त स्थानीय तहया चुनावया पक्षमरु । अमिता देश व जनता, प्रजातन्त्र व संविधान नपां मतलब मरु । म्हैगः चुनावय् वानय् नु दक जिमिसं प्रतिनिधिसभाया पक्षसं वकालत याडा बलय् चुनावया पक्ष कः पिन्ता हेबाय् चबाय् याता । केपी ओली जिं प्रतिनिधिसभा विघटन याता । चुनाव लाखौं करोडौं मनू तय्ता सचेत याय्गु अवसर खः दक जिमिसं धाया । थौं कन्हे नेम्हा प्यम्हा दलय् नेतातय्सं बैशाखे संसदया चुनाव, कार्तिकपाख्य स्थानीय तहया चुनाव याय्गु दक अकातं अकातं खाँ ल्हाड जुला । अमिसं देश व प्रजातन्त्र, जनताया

मतलब तःगु मरु । देशता न्ह्याब्लें क्वथय् थुनय्गु ज्या अमिसं याडः च्वंगु दः ।

स्थानीय सरकार मदय धुनय् वं कर्मचारी ज्या सानय्गु बन्दोबस्त संविधाने मरु । म्हैगः या स्थानीय निकाय स्वयो थौं यक्व हे पाय धुकल । कार्यपालिका, न्यायपालिका, व्यवस्थापिका समेतया अधिकार अःया नगरपालिका व गाउँपालिकां छ्यल च्वंगु दः । थजगु इलय् कर्मचारीया लाहातय् लः ल्हाय्गु धाय्गु देश भं भं छ्यंथाय् घ्वाडः छ्पय्गु थें जुई । थव स्थानीय तहया चुनाव मयाय्गु जः खः जक धाय् फः ।

अः या संविधान व कानून काथं निर्वाचनया न्हि ल्या क्वः छित धःसा शासक दलं थः ता काथं छिथें याय्ता जूगु खानय् दः । जनतां त्याकः छ्वः पिसं जक शासन याय मः धाय्गु मतिं निर्वाचनया पा लिडागु खः । निर्वाचनता छुं नं त्वहः तयो लिछ्याय मज्जु । निर्वाचन आयोग धाय्गु संवैधानिक आयोग खः । निर्वाचनया न्हि ल्या, प्रस्ताव, घोषणा व निर्वाचनया फुक्क जिम्मेवारी निर्वाचन आयोगता बियमः । धात्ये संविधान संशोधन याय्गु खः सा थव खाँ दुथ्याके मः ।

### चिरीबाबु महर्जन यल महानगरपालिका



स्थानीय तहया निर्वाचन इलय् हे याय् मफूसा तस्कं खतरा जुई । जननिर्वाचित पदाधिकारी पिनिगु ई सिधःगु व वडा कार्यालयं याय मःगु ज्या अथें तुं ल्यडः च्वंसा दे गथे हज्याई ? मेयर उपमेयरया ज्या थप्य जुयो च्वनि । थजगु इलय् स्थानीय तह गथे न्ह्याई ? स्थानीय तह जन निर्वाचित जनप्रतिनिधिपिसं बाहेकं चले याय फैं मखु । उकी संविधानं स्पष्ट याड तःगु खाँ त्वः त मेगु लॉपु छाय् मः जुय्गु ?

## नपालाय्गु ज्याइवः

माघ १२, बागमती प्रदेशया मुख्य मन्त्री राजेन्द्र पाण्डे नपां वयकया कार्यालय हेटौडाय् ख्वप नगरपालिकाया प्रमुख सुनिल प्रजापति, नेमकिपा बागमती प्रदेशया सांसदपुं सुरेन्द्र राज गोसाइँ व सिर्जना सैजु, ख्वप नगरपालिकाया उपप्रमुख रजनी जोशी जुपुं नपालाड ख्वप नगरपालिकां चाय्कः तःगु कलेज, ख्वप अस्पतालं बियो च्वंगु सेवाया खाँ ब्याक दिल उगु इलय् वयकपिसं प्रदेश स्वास्थ्य मन्त्री निमा लामा स्वास्थ्य निर्देशनालयया वरिष्ठ स्वास्थ्य प्रशासक नरेन्द्र कुमार भ्ना नपालाड कोभिड भवत्वचं मपुंकः पाडः तय्ता जगु ज्या इवः या खाँ काडः दिल । नपां ख्वप अस्पतालता सच्छिगु शय्याया मथां स्वीकृत बियतानं धायो दिल । थुगु खाँ या प्रक्रिया हछ्याय्ता स्वास्थ्य मन्त्री नपां स्वापु दः पिन्ता निर्देशन बियगु, नपां मः काथं गवाहाली याय्गु बचं बियो दिल ।



### सुवर्ण श्रेष्ठ

प्रमुख शंखरापुर नगरपालिका

जनतां चुनावं हे खः । उकिं छुं नं त्वहः तयो स्थानीय तहया चुनाव लिछ्याय् मज्यू । इलय् हे चुनाव जुयमः धाय्गु मान्यता खः ।



संविधानं ब्याख्या या काथं स्थानीय सरकार शासन ऐनया लिधंसा धाय्गु स्थानीय तह मदय्क तय मज्यू धाय्गु मान्यता खः । इलय् हे स्थानीय चुनाव जुयमः जिमिता जनतां ब्यूगु ई डादा खः । जिमिसं याडागु ज्या ज्यू मज्यू दक ल्यइगु

### हरिप्रभा खड्गी

उप प्रमुख येँ महानगरपालिका



निर्वाचन आयोगं २०७९ बैशाख १४ निसं २२ गते दुनय् चुनाव याय्गु न्हि ल्या क्वः छ्यगु दः । उगु इलय् चुनाव याय् हे मः । चुनाव याय मफूसा भ्नी अपलं घवां घवां ल्यूने लः वा नि । दकलय् तः हांगु ज्या स्थानीय तहया चुनाव याय्गु खः । जनतां नं न्ह्यं न्ह्यलुवापुं माल च्वंगु दः । लिपा मलाकसिं चुनावया न्हि ल्या क्वः छिय मः धाय्गु जनताया सः नं खः । नेपः या सरकारं थुकिता ह मच्चिइकसिं मगा ।

मोडर्ना खोप ब्यूथाय् प्रमुख ज्यू

२०७८ पुस २९ गते)



ख्वप नगरे बुस्टर डोज खोप बिल

२०७८ माघ ४ गते)



**ख्वप नगरपालिकाया प्रतिनिधि मण्डल बागमती प्रदेशया  
स्वास्थ्य मन्त्री नपां** (२०७८ माघ १२ गते)



**नगरस्तरीय विपद् व्यवस्थापन केन्द्र (सीएमसी) या बैठक**  
(२०७८ पुस ३० गते)

